



愛日堂吟藁卷八

仁和趙

昱谷林

倦游吟之一

讀司馬長卿傳見其昆仲諸公謂卓王孫以長卿故
倦游皆爲惜其貧嗟乎以司馬氏之才從昆弟假貸
爲生貧而遊遊而且倦若此之甚也後始有遇奏賦
天子飄飄有凌雲氣游天地之間意又何其若是之
壯也予年來貿貿居京師久而歸去年春復來都今
又將歸檢所作近詩若干篇題曰倦游吟正以遊旣
久心益倦如窮鳥鍛羽勞鱗頰尾心結形頽彈響叩
景放言遣辭尤見其情酒酣耳熱之後收視返聽之



餘壯志都消而精神境像卽已分焉矣且家有白髮倚閭缺魚菽之歡質之禮經游必有常之訓常爲定所今予去來靡定而身世之間弗援弗推亦復不振遂尤爲中心疚慝也昔東廣微補亡詩有云眷戀庭闈心不遑安彼居之子罔或遊盤誦詩執禮以自責勉今而後亟屏跡埽軌循內則之篇翫南陔之旨庶幾一省從前之漫浪而量度於才不才之間遇違得失前後絕殊而莫爲之定古人其何以迪我也游尚敢云乎哉倦益思自返已歲在上章浚灘正月旣望

谷林書

登隱几山樓

南華堂雨中看梅六緣澹園同作用偏字

明日雨霽二君別去獨坐花下再用偏字賦三絕句每至小園輒動出門離索之況今值春莫又將北行

感賦

吳山晚望見桃花無數

臯亭喚渡觀桃卻憶前游相隔廿年矣

寄賀大兄特晉大司空

游虎阜尋真孃墓在一祠宇後門局不得進裴回久之賦詩二首

毘陵道中

春盡日丹陽道中聞子規二首

晚泊丹陽城下

蒜山兒子一清從孫乾一同作

三月晦日京口阻風 邗上畱別嶰谷半槎弟

葯林奉使佐苻洲廷尉開濬淮河駐館高郵以先往

南通州巡河余舟徑過不復入城卻寄三首

舟過露筋祠 曉發滕縣二首

穀城有項王墓乾隆二年里人立新碑于神道日晚

駐車偕乾一從孫視之碑陰有東阿學博張昉初小

記并詩一律同和其韻 再次前韻

次韻乾一謁亞聖廟

去秋南歸從濟寧登舟見漁家作詩一首未曾錄出

迄今北上道復出此追省祇得額聯遂足成之并以

正之大兄陸天隨云到頭江畔從漁事織作中流萬

尺篋頻年客役急欲息機而大兄亦頗有遂初之願

觀此未知以為然否

意林用昌黎左遷至藍田示姪孫湘韻寄懷大兄余

亦次韻 次韻堇浦編修方鏡二首

郝陵川有方鏡詩二首用韻呈堇浦

題鹿田太守小山泉石圖

讀舊唐書太真傳 小序 讀元朱晞顏宮詞 并序

京師六月雨輒連旬絕似江南黃梅雨較少遲耳用

少陵梅雨韻賦二首

次韻大兄寓齋鄰家棗樹有年一朝伐去四首

七夕有感 立秋苦雨病起寄意林

晞

都城中元鐙辭四詠

次公壻七月十五夜同坐翫月有作次韻

寓窻無事以素紙造白箋數十漫書一絕

書包春河太守都門銷夏詩後二首

東壁病目兼有河魚之恙寄問書局二絕

大兄有一老馬為人竊去作詩寄之

奉送大兄歸田四首

七月二十有六日夜起送大兄南歸兼敘得請遂閒

之致得五字詩四十四韻

送大兄登車再成一律

送別乾一從孫侍祖南歸二首

大兄別去二日獨至寓齋惟見豆花延曳不勝岑寂

即成二絕句

登隱几山樓

晚景偏宜翫山樓更上層無邊風月思屬念鷺鷗朋春到

池西柳鄰呼竹外燈倦游還隱几依舊數峯青園梅初放
樊榭共坐

語及舊交巒城繡谷南垞石倉先後徂謝葑林
堇浦西顛或宦或游不勝寥落故有鷺鷗之句

南華堂雨中看梅六緣澹園同作用偏字

疎香惜別記三年客至攜吟水竹邊一餉倚闌春雨過落

花吹起晚風偏

明日雨霽二君別去獨坐花下再用偏字賦三絕

句

夢日堂吟集卷八
四
依人新月弄嬋娟一片殘香絕可憐太息尊前誰與數避
風幽館燭花偏

醉裏還疑身作客醒來索笑只檐前劇憐池北飄零處小
住春風一角偏

花事關情任獨眠愁人清曉嫩寒天還思昨夜黃昏雨花
底微吟得句偏

每至小園輒動出門離索之況今值春莫又將北

行感賦

憐余秋盡返衡門塵土鬚眉一望昏富貴虞翻無骨相支
離庾信有林園兒搜敝篋藏書在弟數臨窻舊竹存太息
年來屢馳逐柳搖春碧又消魂

吳山晚望見桃花無數

清眺層樓上憑襟窅靄閒江光延遠渚花氣落空山春倚
牆西暮青圍竹裏閒城南梯石路遐指舊名關

臯亭喚渡觀桃卻憶前游相隔廿年矣

溪桃見無際一徑壓瀾漫花泊青山遠歌翻綺扇寒年年
人面改落落酒杯寬太息迷津後重來問渡難

寄賀大兄特晉大司空

藤花鳩鵲噪連朝寵命新頒位特超

以吏部左
侍郎遷

俾列冬官

參獨坐久推清望著三朝臣心無忝恩逾渥祖澤長流
福自饒爲報弟昂相頌祝梅羹金鉉早看調

游虎阜尋真孃墓在一祠宇後門局不得進徘徊

久之賦詩二首

寂歷名姬幾許秋爲尋香骨小淹畱空憐窈窕清魂返不見蕭條墓草愁新燕子飛衣翠落白鶻花放淚鉛流從來才色都無據爲語吳儂合罷休
客裏徘徊冷似秋香魂欲酹句應畱同聽蘇小笙歌咽竝結吳宮花草愁黃土永隨春蘚合紅顏長付碧潭流音塵省識繁華夢佛屋參關爲小休

毘陵道中

吳州過漸遠回首渺鄉關盤曲舟如磨敬危岸似山花評春事減漁計晚晷閒幾惜韶華逝年來此往還

春盡日丹陽道中聞子規二首

殘春難縮竟如絲客意銷沈了不知何事禽言翻解得篷窻時聽一聲遲
花飛鳥語劇關情況復催歸咽更清客夢醒餘春事減江城雨細杜鵑聲

晚泊丹陽城下

行舟忽小住人語在斜暉城迴浮屠出風迴碧落微船頭藏櫓酒客子戀春衣百里江程去江雲繞路飛

蒜山兒子一清從孫乾一同作

危峯落江渚江流日浩浩曠淼矚突兀近視鑱削造孤撐一掌懸雙石左右導蹲豹洪濤激蝕齧觸怒巉巖纜可繫時掠片帆峭阻風適小住循岸徑一到客懷聊以放移

時幾呼嘯矯首驚石勢傾翻狀回鷓兒輩膽力微勿狎嶽
險告繫余興未闌游跡詎輕掉歸理坡翁詩高哦獲佳妙

三月晦日京口阻風

清明大好翦江去突地鼉鼉鳴曉風沙岸舟圍深似屋雲
檣帆卸立如叢吏呼官至頻驚坐是日適達官過
候吏雜還喧甚水逆潮
生故惱公一笑且謀京口酒不知春盡客途中

邗上畱別嶰谷半槎彙弟

連劈門才卷軸傳洛塵睽悟憶三年丙辰初入都始
與昆友相晤屋懷

陸氏東西勝三過維揚未得一
到小玲瓏山館玉竝荀家內外妍前事不

忘修素業刻潛邱注困
學紀聞方成江山大好暢吟篇白華常遂閒居

養游子天涯對惘然

葯林奉使佐苻洲廷尉開濬淮河駐館高郵以先

往南通州巡河余舟徑過不復入城卻寄三首

臺指文游首重回秦郵自昔聚多才羨君吟興乘公暇置

酒攜人一再來

風流寂莫秦淮海異代文人實辦香勝侶如雲從玉局一

時騷雅繼漁洋

匆匆南北又分行風雨寒江管別情寂莫河干初離卻抽

帆一徑過孟城

舟過露筋祠

青蒲獵獵見叢祠柔櫓聲中晚過時新月一鉤烟水上碧
璫瓌淨洗蛾眉

曉發滕縣二首

小麥將秋待雨成
昨宵微點過雲生
馬驚殘夢人初憶
得花開逼曉程

邨路偪仄行人稀
車翻馬蹴隨高低
客途何以慰寥寂
露香刺眼紅薔薇

穀城有項王墓
乾隆二年里人立
新碑於神道日

晚駐車借乾一從
孫視之碑陰有東
阿學博張昉

初小記并詩一律
同和其韻

碑陰紀略史稱項王墓在穀城合之縣志訪之里人亦云今墓在山麓惟餘荒冢一堆旁又有一小冢云昔羽敗後其將李姓者為之守魯不下與漢王約以王禮葬之城始下李即自刎旁一小冢必其人也惜史失其名耳張詩附載百二秦關王氣孤八千橫掃仗昆吾山圍嶧荒墳在水去清溪故國無花草千年逃往事精靈異代想雄

圖李君節義邱山重青史無名問老夫按漢書初懷王封羽為魯公及死魯又為之堅守故以魯公禮葬羽於穀城碑云以王禮葬非也

英雄千載墓門孤
司馬當年且面吾
魯國招魂公禮舊
五侯分體霸功無
生花寵媛同心種
瘞骨將軍後死圖
日落悲風新碣在
猶餘喑啞廢千夫

再次前韻

歌徹雞鳴四壘孤
澤中轉戰給迷吾
攫將秦鹿終須失
運盡金刀竟亦無
西楚稱王雄蓋世
青山埋骨笑生圖
淒涼誰似田橫客
東魯遺民有壯夫

次韻乾一謁亞聖廟

崇新瞻廟貌

皇紀落成年雍正十年重修古坐旁楹侍殘碑圯墁前三

遷垂母教申命表親賢鄒魯居相接心傳願學焉廟有琢石遺像

二侍於邦國宣獻之側屈膝反蹠即古坐也又有遺像刊石者三其一斷者最得神今惜置于牆側廟有碑紀元豐

三年封父為邦國公母為宣獻夫人自元明以來皆未加封司空大兄於乾隆二年秋巡河從東省紳士之請還朝

上疏加封已得請行

去秋南歸從濟寧登舟見漁家作詩一首未曾錄

出迄今北上道復出此追省祇得額聯遂足成之

并以正之大兄陸天隨云到頭江畔從漁事織作

中流萬尺篋頻年客役急欲息機而大兄亦頗有

遂初之願觀此未知以為然否

吳儂漁計足詩思在浮家篷上堆黃菊船頭喚白蝦烟蓑

閒即脫新酒熟能賒一笛滄浪晚悠然繫淺沙

意林用昌黎左遷至藍田示姪孫湘韻寄懷大兄

余亦次韻

任達詩情寄樂天裁箋寫韻已盈千劇憐恩重觚棱夢暫

許官休維下年斂手枯棊觀局外閒身白髮數尊前思歸

欲踐西湖約疊話山隈與水邊

次韻堇浦編修方鏡二首

良工鑄鏡法幽方鈿匣初開已露芒秋水仙瞳邀盼睽春

雲螭首鬪輝光青青曉貯玲瓏戶帖帖寒宜澌灩塘位置

花籤與研榻更將雲母短屏張

割取菱花樣一方鎔成珍竝寶刀芒金輪別試春深戲赤

帝重開楚炬光竹挺疎棱臨畫檻姝窺明月浸秋塘紅闈
莫漫誇圓照坐見鄰家四面張

淮南子高懸大鏡坐見四鄰

郝陵川有方鏡詩二首用韻呈堇浦

鏡裏虛涵玉折搖別開好面影春翹臺邊端正芙蓉出奩
角分明粉黛消界畫闌干通片片周遮步障隱蕭蕭何年
畱得形模在憶卻懸同羸氏朝

不似臨風團扇飄鑑心止水淨纖毫破觚恐失卿壺義外
朗還同秋月高漢殿一籤珍可竝秦臺四尺影難逃祥金
范出如圭樣獨看銀翻素壁濤

題鹿田太守小山泉石圖

當窻王屋自亭亭爲寫風情翠羽屏風景更憑仙吏說芙

蓉飄縵郡樓青

相逢燕市記睽攜十載重吟冬秀辭觸撥鄉園憐庾信小

山名竝繫余思

小園草堂名小山冬秀詩一卷君在澤州作

讀舊唐書太真傳

并序

樂府有上陽白髮人曲爲楊妃新寵六宮美色
輒置別所上陽其一也貞元中尙存焉

孃子宮中鬪綺羅五家花隊散鳴珂上陽望斷長門賦一
曲貞元白髮多

讀元朱晞顏宮詞作

并序

宋思陵時有菊夫人善歌舞爲仙韶院第一旣
而稱疾告歸一日宮中曲舞不稱旨提舉官奏

曰此非菊部頭不可於是宣喚再入晞顏用其
事賦云月照芙蓉水殿秋仙韶一曲奏涼州高
皇尚愛梨園舞宣索當年菊部頭予反其詞意
賦之

莫謂君王不解愁新聲側豔鬪空侯誰誇第一仙韶院閒
煞當年菊部頭

京師六月雨輒連旬絕似江南黃梅雨較少遲耳

用少陵梅雨韻賦二首

京國今愁雨江南舊憶梅一時塵滌去六月暑將來吟侶
渾無賴羈懷總未開障泥癡馬惜車轍幾應迴

江鄉梅已送此地始迎梅氣候殊南北音書滯去來交流

官路溢新漲玉河開海甸津門指風期舶趨迴

次韻大兄寓齋鄰家棗樹有年一朝伐去四首

棗林高指東家屋望影婆娑記十年幸有芳鄰從卜擇日
看老樹長風烟語傳殿檻來來異歌送筠籃纂纂前正藉
常時通款洽橫加斤斧劇相憐

天涯何處結比鄰大好循牆花木親隔院棄捐千實紫穿

堦羅立兩枝新

根引過牆庭長二株每加護惜衰
回其下今將歸去惜未見其森然

扶持顧

影同還味

還味棗見爾
雅還味短味也

摧折憐渠邁劫塵為誦幽風章

八月剝時空乞引年人

不同酸棘傍檐生標格重喬見性情

埤雅棗性重喬

似筆工樵緣

客好

筆樣棗見山谷詩

如瓜洵美以仙名長竿撲後思鄉久嘉樹

吟來得句清極目春風動搖裏菟葵燕麥莫猜驚
斷咽鄰蟬憶晚枝豈因棘刺播風詩盤根深淺何須論齊
物凋榮信有時贅許曾修新婦早食逢偏恨女郎遲繁陰
坐待童童日種樹詩傳百歲思

七夕有感

長望秋河耿似銀微雲掃淨露華新藍橋遠駕憑神女碧
海輸明乞阿窺術鮮靈丹還少壯愁兼鄉耗屬艱辛年來
到此增羈思記取天孫四渡津

余出門歷四七夕矣

立秋苦雨病起寄意林

扶病起看雨桐葉飄輕翠蛩鳴畏燈停燕入穩雛睡嗟弟
久行役風塵幾顛顛今我胡不歸空墮故鄉淚斯味中懷

抱惻怳乘秋至

都城中元燈詞四詠

小燄迢迢綠意生兒童擎向六街行露盤旋蕪秋香過涼

月紛紛滿鳳城

荷葉燈羣兒手持晚行街市翠盤明燭搖颺可觀

一椀玲瓏蔓蒂形檐花涼借晚熒熒東陵五色鑱華巧十

樣璫瓌揀小青

西瓜燈剗去其瓢中空外朗涼碧熒然更有雕刻花木魚鳥詩句可備燈品一種

向晚齊擎火樹紅繁星點點綴秋蓬涼風剛及西流月一

穗烟霏紫陌中

星星燈以青蓬蒿折枝上綴香條千百蕪之高擎聚觀火星繁盛

陸海揚生羅襪塵瑜伽蓮燄照行人從今不識凌波冷煖

貼宮雲步步春

岸蓮燈都城少河渚晚用蓮燈施於陸地即當水上也

次公壻七月十五夜同坐翫月有作次韻

對月心如古井波團沙無復論恆河感君歸權西風後獨
照霜蟾兩鬢多

疊疊年華已過中細腰難學楚王宮到頭身世從盈缺來
日秋光苦未同

寓窻無事以素紙造白箋數十漫書一絕

削柿原宜尺素傳怪他多矴粉光鮮魚蠻百个誇新樣隨
意縱橫劈白箋

書包春河太守都門銷夏詩後二首

一卷天涯老客情寫將霜雪句琮琤紛紛總總牢愁易渾
渾蒼蒼風格清蟲語冰心違半夏令乘金氣伏三庚何堪
旅食騎驢客翻以髭鬚畏後生

友生羈旅藉過從暫解朝來曠恨胸幾爲夫君陳薛荔敢

同幽士怨芙蓉

余去秋南歸集京師所作詩名秋芙蓉吟

老疎詩筆名逾賤力

瘁田功歲不逢醉後蕪詞塗紙尾浪浪秋雨感萍蹤

東壁病目兼有河魚之恙寄問書局二首

羸瘠蝸睨洗纖翳盥沐晨興首爲低遮眼文書名上藥問
君曾否勝金篦

忽抱河魚損食眠休誇經笥腹便便朝來一覺繩牀穩應
有人嗤邊孝先

大兄有一老馬爲人竊去作詩寄之

莫訝須臾事幾違瘠羸一馬竟何歸不煩買地施金埒空
自憐馴惜敝帷造父鞭環今改馭塞翁得失定知幾便同

老棄秋風裏誰為窮途首藉肥

奉送大兄歸田四首

泉石遐心竟不違高蹤去省履音稀奉身孤潔三朝久懷
土夷猶一舸歸北郭花塋謀小築南屏詩社結巖扉何人
會得閒閒意暫脫華簪便息機

潞河疏醜憶程嚴乾隆丁巳奉命巡視北河由天津至豫省疏奏開濬俾漕運民田俱便官

解秋風便不炎十畝松楸懷丙舍一龕鐘磬臥西崦蟬華

疎警涼初蛻蜜勺中邊味總甜野老細論烟水事霜顛誰

識舊頭銜

四年京國得追隨屋指東西隔九遠酒殘今宵同醉裏詩

牌後夜獨吟時常時相過共集詩牌臨行遺余二奩池塘舊夢連春草羈旅

牢愁憶子規歸日正逢重九會茱萸鴻雁寫相思

蕭蕭行李往秋林酒味何如歸興深杖國買扶雕玉鳥時買

一拄杖隨攜賜書珍護辟銀蟬商淒白露消殘暑烟洗青楓認

故岑繞膝諸孫勤督課一經遺勝滿籛金

七月二十有六日夜起送大兄南歸兼敘得請遂

閒之致得五字詩四十四韻

束縕幾請火紛然離緒結寓隔街東西夜行畏躡躡聞闔
望未開呵止環衛設出門復入門小坐意為憒竹簾一層
涼窻燈青燄蒸幽光四更吐仰屋兔霸缺閣閣蝦蟇柩晨
星疎可擷摳衣徑逆前僕夫已駕鐵朝衫毳褐換布襪塵
鞞渫誰復識老翁脫簪霜髮截宦海四十年馬長惜齏齧

于齒老而傳聲名仗孤揭分咎退遲頓屋壁且挂舌三朝
忠愛心戀戀捐余玦平生馬少游下澤懷駛軼雲山縱麕
鹿風露卻蜻蛉整身而倦世未肯名位縹吟篇滿篋裴賜
書百城埒既有宅相偕更喜一孫挈我送揖道旁揮手再
三別曉色辨昉爽行月誤軌轍匆匆語未竟過耳車聲絕
雁心淒以耿柔腸鬱且折揚舫下通潞白露涼占節秋水
時正至一帆迅飄瞥重九賦歸來好景憑寄說去家十五
載親朋幾更迭棠咏斑白多七人情款悅檢點獨無我茱
杯懶羈屑彫胡炊秋根郭索縛稻啜幽居葛嶺妍石泉龍
井冽新酒菊天時孤懷霜下傑西村湖隱深處士山心潔
舟以名不繫堂以擬快雪稼問老農知經課諸孫閱洛社

呼幸民論年集耆耄竭來朝市喧劍首吹一吷得時失亦
順無累懸解晰曠哉託材輕逍遙散寥泐顧我尚淹畱涯
返感寂蔑忼慨寄悲歌蓬勃逐塵媒倚閭白雲多浮生旅
鴻子他鄉輒寤歎明年歸計決湖頭春水生相於聽鷓鴣

送大兄登車再成一律

登車揖別徑匆匆露冷征衫曉日矇白髮秋光紛眼底平
生心事付杯中臨期烏鳥情相勗入夢孤鴻跡未同來去
適教逢此日前塵歷歷等飄風

是日已歷三年余且失志不堪回念

昔余丙辰七月廿六日到都晤對今大兄別去亦於

送別乾一從孫侍祖南歸二首

客緒相於相嚮憐子歸我尚滯天邊孤篷共憶丹陽路風

雨春深聽杜鵑

一櫂秋風汎直沽分甘奉杖阿翁扶客程正藉消岑寂行
侍談經早晚趨

大兄別去二日獨至寓齋惟見豆花延曳不勝岑
寂卽成二絕句

夕憐人散水長東感慨盈虛烟市中寂歷閒堦更無語豆
花牽蔓任秋風

嫩莢扶延惜幾回懷人悵別殢詩才湖山謾說歸休晚霜
徑黃花伴酒杯

愛日堂吟藁卷八

愛日堂吟藁卷九

仁和趙 昱谷林

倦遊吟之二

題西顥津門雜咏二首 澎湖漁隱圖二首

題秋柳圖贈別次公壻南歸四首

岍山進士次公壻別去之明日獨坐寓齋送者返自
舟次持札至知未抽帆卻寄二首

對漚自津門入都正喜晤對重九明日卽又別去賦
贈二首

重九後一日賦五絕句寄送西顥自津門歸里
憶大兄葛嶺莊居

意林於園中修葺隱几山樓更起一層江湖諸山歷歷在目賦詩寄示不勝故園之念和韻答之

園中高柳數十株今春多有枯落急命翦去舊枝俾長新枝以匆匆出門未暇課竣倦懷不置絕句二首詢意林

晴江以落葉詩見示賦贈二絕句

年來目眊眠書不離眼鏡霜月在庭亦取照之更覺朗徹有作

恭和

御製游盤山天成寺登江天一覽閣韻

得大兄抵家之信寄懷三首

第添

枕上聞早鴉

今冬小雪大雪日都城俱得雪志喜以卜豐稔

聞意林遣嫁二女賦寄二首

聽雪

雪中憶大兄住南山尚未移湖山葛嶺莊居

冬至日得家書知大兄入城招同諸兄弟聚飲明日偕過小園將遞作銷寒會悵余獨不與檢點惟無薛秀才定應動念旅人已

大兄過游先人舊園賦詩辱寄奉誦之下撫今追昔情見乎辭不勝惻愴謹和元韻二首

汪崑麓女婿舉子相聞兼請錫名乃取紹辰宜繩二

名奉報并詩賀之

題晴江郊居圖

小孫德元年方七齡聞其寫字有筆力能作大字甚望其長而有成也賦詩示勵

以秋芙蓉吟彙呈正鄭筠谷侍讀未蒙削政惠我佳篇賦謝

堇浦編修題贈秋芙蓉吟彙即用余報謝筠谷侍讀韻再疊韻奉答

謝堇浦編修見遺重刻龍藏彙記

陸氏外孫生甫四月病亡詩寄敬伸壻并慰吾女

謝客餉韭

小除日堇浦攜示己未詩鈔一卷竝遺冰魚二頭賦

謝二首

除夜有作呈東壁

除夜寄懷大兄追憶昔時相聚之樂情景如昨也

庚申人日立春

并序

當歸八首

并序

苦寒

樊榭敬身有和友人失貓詩戲作三首

再賦三絕句

憶梅

歸期擬於仲春惜已過矣

題西顛津門雜咏二首

采掇多憑圖史新次分析木號天津庶魚庶草都堪記川谷神奇更海人

靈區風物百篇垂境擬蓬瀛繫我思東汎直沽七十二他

年來補竹枝辭

滄湖漁隱圖二首

東涇南浦數相期，憑仗秋風把釣絲。
江畔悠悠漁計得，一生常羨陸天隨。
畫裏閒身認隱夫，烟波只合伴鷗鳧。
從他占斷風光好，鰕菜扁舟戀五湖。

題秋柳圖贈別次公壻南歸四首

瑟縮官橋柳倦青，瘦肩騎馬玉玎玲。
臨岐乞與冥冥思，漂泊關河宿下亭。
飄蕭著墨不披猖，商略須分菊半黃。
一樣西風殘照裏，可能聲畫敵漁洋。

幾枝顛顛上秋寒，舞斷江南金粉殘。
一縷斜陽收不盡，依稀猶認額黃看。
不遣纖纖嫩柳垂，涼風披拂幾經思。
慚無山抹微雲句，粉本難工女壻詞。

峽山進士次公壻別去之明日獨坐寓齋送者返自舟次持札至知未抽帆卻寄二首

蕭晨顧影忽淒清，宛轉車輪動別情。
送客頓忘身是客，替人一一數歸程。
羨他作伴同歸去，月進篷窗好共攜。
燕子也憐秋社近，空梁無語暫相棲。

對漚自津門入都正喜晤對重九明日即又別去

賦贈二首

膠膠擾擾悵何之
邁子他鄉慰我思
春暮竝憐西笑客
秋窮同賦北征詩
韶華過映成吹劍
心迹推枰類舉碁
燕市劇堪謀一醉
那知重九又言離

一徑抽帆通潞船
秋裝辭卷意飄然
水西勝侶勞塵夢

謂蓮

坡儉堂西顥端人諸好

陸海羈懷墮酒邊
十日菊看人自別
寒號蟲

候物能天津門三百稽程近
還往詩筒好為傳

重九後一日賦五絕句寄送西顥自津門歸里

霜林帆葉照清酣
羈泊閒心子細諳
鷗鷺年來多屬念
卽看搖落舊江南

賦別三沽客思清寄懷詩卷倦登臨

時方刻津門雜味

知音祇有

南湖老賸賞人間
枯槁吟

謂樊榭

憶著鄉關便鮮歡
下亭漂泊歎儒冠
羨君歸賦檀欒日
慈竹三竿與兩竿

去秋我亦賦歸去
今又秋深送子歸
點檢故人詩冊子
紛

如涼葉滿亭飛

去秋余暫歸里門同人各賦詩寫成冊子贈貯歸裝今春復入都葯林已至維揚次

公南歸今西顥又別去聚散如萍余滯跡天涯殊難為懷耳

依舊湖山入眼青
快招吟侶話西泠
重湖烟水便疎放
一任流連小草亭

憶大兄葛嶺莊居

健腰可藉瘦藤扶
湖水湖烟選勝區
張翰秋鱸飛玉雪
樂天卯酒讚醞醑
洄風小艇無心繫
入榻青山與客孤
更擬

南峯來絕頂佛龕中伴白雲夫

意林於園中修葺隱几山樓更起一層江湖諸山

歷歷在目賦詩寄示不勝故園之念和韻答之

結念春草園吟共二林屋夢繞清華境親曾布水木旅食

故鄉心山湖常滿目家弟日盤桓一編風雨讀為報岌岌

樓枝梧防傾撲昌黎詩朽西偏倚一層危出竹閒綠望望

江湖山翠浮麟鹿逐臨虛藻井連檐栢聚如束平烟下杳

然百尺寄高躅仙人夙好同意像超凡俗遙岑撫隱几橫

檻臥籛曲來語以樓有檻可置簟臥游感懷倦翮微遂息故巢欲左右

圖史陳畦町蔬果足明年春水生歸權布帆幅會當重與

子對牀訴幽獨登高尋舊約老眼快新矚

園中高柳數十株今春多有枯落急命翦去舊枝

俾長新枝以匆匆出門未暇課竣倦懷不置絕句

二首詢意林

柳記西池手種來蟲書蠹穴幾凋摧客魂牽率思人樹曾

否新枝掃石臺

新結高樓最上層柔條垂影望鬢髻明年準備歸人至好

共春風拂檻憑

晴江以落葉詩見示賦贈二絕句

欲賦秋聲策策先寒蚤蜻蛚劇相憐才名不讓崔黃葉可

繼漁洋詩話傳

我亦吟蟬愛落暉秋隨詩句滿空飛意行孤詣長安裏此

日休逢棲楚違

年來目眊眠書不離眼鏡霜月在庭亦取照之更

覺朗徹有作

老眼還能別太清高寒圓照藉輸明春冰不隔青蓮淨維摩

詰經目淨修廣如青蓮水玉時教銀海傾鬢鬣光分窮碧落逃離秋

擣驗長生臨堦細字須來辨更要花晨破霧行

恭和

御製游盤山天成寺登江天一覽閣韻

靈區選勝西郊路十八盤山上界分謾謾松濤千澗落登

登粥鼓六時聞維摩僧古通禪悅蒼荀花香淨衆紛何幸

仰瞻畱

睿藻諸天彌覆布身雲

得大兄抵家之信寄懷三首

傳來秋盡返家音一徑山棲深復深歸去始償廬墓願到

至五老峯下先伯父母墳旁僧舍居住閒居真獲遂初心風雲變幻從新態

冰雪崢嶸入故林惟許老僧來作伴相期歲晚助清吟

山心合與世情違便好休官住翠微風忤石尤空作惡夜

行殘漏斷思歸泉分別澗尋幽徑松老危巖識舊扉早爲

誅茆依佛屋安禪一榻便忘機

雁跡羈孤蘄北天時勞鄉思結湖邊秋懷水驛三千里別

集新詩二百篇途中遣興得詩二百餘首鷗侶齊盟尋洛社牀頭有酒

學神仙三朝總繫觚稜夢白髮難忘畝畝年

枕上聞早鴉

曙色熹微喚獨醒
冰牀雪被賸青熒
道人此味年來慣
鷓鴣劣寒聲倦枕聽

今冬小雪大雪日都城俱得雪志喜以卜豐稔

三白欣占多應候
紛紛灑處九衢寬
華凝天闕雲中下
素積西山馬上看
長坑見舊唐書高麗傳
長坑見舊唐書高麗傳
隩隅憐解

布裘寒但知國瑞
憑詩寫宿麥先期來歲歡

聞意林遣嫁第二女賦寄二首

練裙竹笥費支持
三日明燈思遠離
千里寄將兒女語
開槭聽誦左家詩

臨行好為檢絲鞶
猶把明珠掌上看
五女笑余祛篋後
多

君更有六金鸞

聽雪

蕭寥歲晚賸閒身
騷屑寒聲聽得勻
碎壁打窗堪側耳
短檠餘爇劇清神
詩篇合闢今誰共
爐火溫磨祇自親
兀坐氣嚴憑酒力
夜深杯勺試回春

雪中憶大兄住南山尚未移湖山葛嶺莊居

雪飛漠漠斂湖光
贏得詩人候蟄藏
正好蕭閒窺璨瑳
任他挫抑到松篁
惠勤臘日寒宜過
處士鄰居竝未妨
寄語山深太嚴冷
千峯嶽聳境非常

冬至日得家書知大兄入城招同諸兄弟聚飲明日偕過小園將遞作銷寒會悵余獨不與檢點惟

無薛秀才定應動念旅人已

置酒歡家督同懷意轉親友于纔樂事斑白盡天眞次第
銷寒會悠游歲晚身小園憐庾信應念未歸人

大兄過游先人舊園賦詩辱寄奉誦之下撫今追
昔情見乎辭不勝惻愴謹和元韻二首

相過存歿念舊業祇園林庭指南陔在枝連鄂韓陰青氈
同翰墨白首感人琴無限裴回思仲容高抗吟

出處分攜後孤亭坐惜今林泉論往事風木助秋音空矢
爲兄願時憐涉屺心弟彘勤懇日親戚話偏深

汪崑麓女壻舉子相聞兼請錫名乃取紹辰宜繩
二名奉報并詩賀之

陟

佳音千里報維熊遙頌高閣瑞毓充早爲書名稱謝藺恐
教類額媿袁公含飴玉雪緜成颺種德孫枝翠引桐歡喜
天涯舒老眼揮毫相報遞詩筒

題晴江郊居圖

錢塘山水窟烟波足希夷樂郊洵吾土負郭避喧卑君家
好兄弟同居樹夫移不屑事佔畢園三年未窺長裾集帝
學才名動京師繫余獲良覲往往誦風詩羣情推二儁朗
潤內外披令弟抱微尚作圖寓鄉思郊墟婉變在枳堇滿
落籬遺形而放志遐心復何之敝廬寄城市瓊花街隔遠

褚堂里舊名瓊花街見武林遺事

來春試歸權東運河遵湄艮山徑城麓

新綠桑柘枝

城中東河宋時爲東運河見咸淳臨安志歲寒堂集艮山東麓南渡宸游看新綠處悠

悠懷二難滌我京洛淄

小孫德元年方七齡聞其寫字有筆力能作大字甚望其長而有成也賦詩示勵

阿翁不工書漫畫成老醜阿翁又不工薑芽頻斂手汝今甫勝衣未齟嗤黃口尋常上學堂讀書尚謹謏急就迪幼

服蒙求發循誘

德元初入學以蒙求教誦一年

也知弄兔管波趨描窻牖

今聞筆力健作勢頗抖擻又云大字能擘窠知勝否想亦與天來造詣樂觀後時須試捉搦詎容掣臂肘更要正且直心筆兩不苟轉腕神自來指實掌虛受戈法永興虞新樣元和柳家規緬吳興妙絕鷗波叟狐白加羔袖竹挺形科斗石經寫鴻都神碑樛峒嶮太史試學童尉律八體首欲追上上品金石羅皮右白練羊氏風五靈鍾侯聒筆精與墨良無爲俗書狃家雞正塗鴉筆虎莫類狗童子第求益功藝貴可久丁寧屬汝成騫騰聽犢吼

以秋芙蓉吟稟呈正鄭筠谷侍讀未蒙削政惠我佳篇賦謝

吟聲劣澀秋辭拈欲和滋味違醯鹽卷中小語出寒餓半屬羈旅鳴煩恣挑燈起輒讀一過孤蓬百感心無忤竭來鄭公舊同學師風友義原相兼十年契闊等萍梗質以蕪穢夫何嫌尊酒論文轉膠固相於承閒加鍼砭况公雅重翰林署三千風月冰清銜出以六籍振髦俊入則三長專微嚴視此吟諷餘事耳公餘雕績傳虛恬余迺鬱鬱久居

此進取艱於竿頭鮎孤淙淒耿應秋律坐令口角如銜箝
報章示我等瑛璧中慙勗勵辭炎炎玉堂天上不可到只
合幽仄潛夫潛

原作

鄭江

秋江渺渺搖青冥佳人獨立鴛鴦汀凡桃俗杏競妍媚
幽姿照影長亭亭紫皇高居愛仙品不使凡刀裁古錦
彩雲糾縵爛不收搖風戰雨寒颼颼沉瀟溟濛滴寒玉
招拒司權賜湯沐騷人高致搴清芳金霞散綺集爲裳
溯洄從之水一方瓊瑰萬片冉冉香朝曦照曜舒榮光
連叢置之貢玉堂

次韻

杭世駿

秋堂寫韻險語拈如蕤羹美重施鹽靈根汨汨意浩浩
但有活脫無憑恣雲中手把青菡萏嗅之蘇忿心爲忼
攄懷絕類孤月皎論價何止南金兼大聲撼俗非阿好
擬古作者誰猜嫌榮華例與秀句迥膏肓欲向天公砭
枯蟬苦飢警鶴瘦高才不博條冰銜大科未得繼裴陸
小經差喜窮顏嚴斜街卜宅迹轉晦寒廬獨臥神尤恬
酒人吳東壁全謝山日過訪同隊一一游鯨鮎力追幽詣造
古澹舌本淵永難加箝傳人豈必區顯約立論吾欲齊
涼炎史官今聞待王隱徵士安可無陶潛

董浦編修題贈秋芙蓉吟橐卽用余報謝筠谷侍
讀韻再疊韻奉答

芙蓉淚借秋露拈徒工刻劃慙無鹽石交疊響妍韻和春
容不作商聲恣冰霜歲晚樂調護晴窗小愜詩人欣嗟予
年來學飯顆作詩之外無他兼畏人避蹟如避債出處戶
限成疑嫌不須碎琴駭都市誰將嵇嬾膏肓砭龜尾只便
泥塗曳馬首不受金絡銜公等鐘鏞應律呂聲名旗鼓中
軍嚴窮乃愈工勞愈苦達則抒語多愉恬十石連弩捷雕
鶚千斤餌犗鉤鯁鮎詞源灑瀚倒三峽蜚騰衆口喁喁籍
獨立江花寂無語幽枝不到陽光炎身世謾論通晦裏悠
悠江漢分沱潛

次韻

杭世駿

蕪言枉贈復蒙谷林徵君五兄疊韻見答寒宵無

俚再依前韻奉酬

雪山微笑天花拈忽然散作空中鹽幽廬有意鍛苦語
清商哀徵聲非恣興酣寫出三萬軸一昔快讀心神快
正風不使靄紫亂至味似有酸鹹兼古情時與作者會
澀調劣得凡夫嫌露盤金掌挹沆瀣力洗俗豔良余砭
但能傑句愜心賞枉用薄宦誇頭銜王昕人身旣不惡
陸厥風槩尤矜嚴風簾不動紙閣閉曳袖簌簌吟幽恬
有時摘句圖主客酌我桑落烹枯鮎英韶振響雌律應
一切哇咬咸施箝品題合繼謝康樂鮮華朗映初陽炎
行看若木開四照燭龍含曜陰虬潛

謝堇浦編修見遺重刻龍藏彙記

皇矣能仁演帝契有默嚮八萬四千言大寶集法藏千文
 謹排詮連夾咸耦伉裝潢赫蹠黃梅檀珍供養醍醐攪一
 味正法眼錚障首揭大佛頂青螺春日此日西來拈不
 為文字誑何謂第一義廓然無聖唱有時析鄰虛牟尼隨
 色放藏珠復入衷真珠示無相竈墮本有性塔造無縫樣
 翳佛化流始黃金夢形狀四十二章經教外傳無量白馬
 馱雍門蘭臺石室抗姚秦延蕭梁有唐日興尚再稽內典
 名開成宣索勑唐會要開成二年王彥進准宣索內典目錄十二卷貝多三種樹竺
 國書寫廣思惟坐其下三密神意王細氎臂支破清響魚
 唄亮頌自孝定后蔚為琳宇壯紛紛等篇籍梵夾浩烟浪
 五葉相承久七祖擅立妄北宗門人大照立其師神秀為六祖自為七祖以攘曹溪之統

曹溪嗣南宗南嶽青原亢繙經統要得名義徹無長天子
 號佛心雙峯峙閩閩

陸氏外孫生甫四月病亡詩寄敬伸壻并慰吾女
 纔聞施繡祿忽聽失明珠天實摧苗秀年真等蟪蛄感餘
 彈指頃參到六如無漲乳思孩抱尤憐母淚枯

謝客餉韭

有客餉老韭素紙勞封函云產自汾晉遠攜迅馳颿何來
 此嘉蔬對之口涎饑登盤烟苗肥黃芽珍栗城薑蟠雜葱
 齏臭味同酸醎藝之知可久刈後還復芟宗生與族茂特
 異衆草凡鍾乳性陽溫豐本經鐫劓庾郎殊不貧食鮭語
 詰誦郭公雅風味幽畦翦霏雪懷哉春初時行圃腰鎌鏡

小除日堇浦攜示己未詩鈔一卷竝遺冰魚二頭
賦謝二首

雕瓊鏤葉韻清真十手傳鈔玉筍新異味灤河鯽共瀹一
雙攜伴水精鱗

殘年猶有和詩忙卷裏光陰客裏嘗尺鯉橫盤雙兔臥也
將饋歲作他鄉

除夜有作呈東壁

京雒五載游除夜記三歷一朝墮人海直苦等淪溺往往
笑媒鳩時時嗤退鷁人生處戶限怙惆悵何適聞道恨不
早遂令遲莫惕弓人學為弓所貴用和殼寶嗇不龜藥世
業守泮澌心驚赴壑蛇韶華銷運甓兩兄先後歸我獨顧

影寂天涯伴羈旅一燈餘的皪良朋溯萍聚深談聽驕著

余自丙辰在京師與東壁守歲以後或
客天津或南歸每歲不同今復同寓君說禮懸河吾喬

舌挂壁圍爐楮添酒面風饕擊染指盤盞凍饋歲暖覆
羈他鄉拚一醉飽任殘年喫

除夜寄懷大兄追憶昔時相聚之樂情景如昨也

殘年依舊一燈看三度京華感百端鏡裏鬚髻明雪鬢天
涯落拓賸儒冠羈懷臘盡難為遣孤館深宵分外寒冀北
江南轉相憶當時曾共酒栢寬

庚申人日立春 并序

檢薛道衡人日詩入春纔七日離家已二年予
去年春莫復來都正與詩意脗合賦一絕句

歲紀二年別題詩七日春秭歸落雁裏愁并未歸人

當歸八首 并序

蜀志注姜維母在魏寄以當歸維曰但有遠志不在當歸嗟乎伯約出身許國不能兩顧以全其孝尚不爲君子所恕矧余家有七旬老母羈跡於外身業復無所事謬刺實甚能不急作歸計耶遂賦當歸八詩以行其中歷寓事親從兄課子弟集友朋室家之聚書史之樂而終之以園圃歌事遂情更胡不歸云

當歸懷岷陟親舍白雲邊弱線征衫惜春暉游子憐久譏

姜伯約歸頌傳延年

老母今年七十壽辰時近重陽

更喜勞宣藥行和問

膳眠

當歸有兄弟強半鬢毛斑詩酒頻連和園亭樂往還七人

安素業一老且休閒歸去春將莫棠花正好攀

當歸偕婦隱老去更思歸萊子攜春畚桓公戀故衣料量

需藥餌歎息賦蚍蜉出處年來悞予心白首違

當歸課兒姪早晚愛庭趨阮氏賢誰似王家癖豈吾奇文

師犬子小字識於菟學殖兒曹在殷勤慰老夫

當歸弄孫子若箇似黃童甘味時分果新枝待長桐連翩

三竹馬老大一家翁歲月歡娛裏重扶彩戲同

當歸尋舊雨久約見平生琴疊山心解鷗申海野盟紀羣

還下拜環綬自聯情此道通風雅丁丁伐木聲

當歸理素業家有舊書巢暇日蒐藜脞平生媿五鈔夜燈
昏細讀午枕倦常拋癖此諼憂物何須爲解嘲
當歸樂園圃五畝足幽居風木心無極詩書澤有餘淺梅
春檻在舊竹晚寮疏洗眼清華境塵埃萬斛祛

苦寒

上章涿灘歲月正縮其和隆寒閔元陰布始望無頗臘去
春已交肩輿威棱訶靈臺善推測驗應無差訛僉云今年
甚徵訊黃髮皤義轡卻三卯土囊颯六多大地騁怒蹙長
空呶鳴鼉哀哉氣凌兢噫歎聲咤波道路邁猛厲仆殞在
頃俄高門與隩隅狐熊不知佗予也羈旅人起歎方薦瘡
凍指韓子怯齟齒杜陵哦獨坐頻軫粟共飯難按莎長炕

煉石炭窟室轉蝸螺越絮延燠熅齊紈退總紕絲簾時褰
揭絕似寒門過如蝟輒蹉躅如牛或寢叱如兔臥且罟如
鳥縛媒罔弊裘厖茸擁如腫背橐駝退筆漫漶書如細尾
篆科又如僧寄巢偃僂一鳥窠又如師面壁寂定一達摩
體僵袁安室氣蒸焦先窩陰凝乾雪積老樹堆璨瑳鬚髭
層冰白羣山明嵯峨瓊筴排瓴甌縞帶膠輪軻凌牀如陸
行腹堅曳澤河枯芟經野燒吹不醒黑鷺草名見管子毳幕重
覆羃膏脂厚凝鍋夜燭一再跋冷淚乾銅荷深杯或逡巡
醉面難爲醜窮薪火屢傳不灰木已磨背負獻君曝手療
不龜痂寒只窮袴爾老無燕玉何入穴伏冰鼠作繭閉絲
蛾向晚愈恇怯暉難挽魯戈春凋晨光出生意惜婆娑東

塢候暖律胡能少蹉跎羣物待嘔咐陽回三變禾圖梅數
九九唱罷銷寒歌

樊榭敬身有和友人失貓詩戲作三首

爲問能銜一朵花主人氈煖謾相誇恐因長腳生來相不
臥桃笙善走家

徧寫零丁帖子張任他稱鬼亦稱王南泉閒卻龍蛇手合
鬧東西罷兩堂

一自凝塵几榻侵豈真鼠卽愜幽心聊陳七十餘新事博
物還輸徐楚金

再賦三絕句

折柳穿魚事已空尋聲躡影悄房櫳只饒恩叅無他意豈

爲金輪斷六宮

發屋求時欲幾回於菟形擬竊毛堆主人好事成癡絕覓
句長吟還自來

東舍西鄰任所之怪渠甘作野貓兒從今欲聘紅鹽裏恐
換臨安不捕獅

憶梅

歸期擬於仲
春惜已過矣

冰侶相知久清魂眇一涯月生交半樹雪在任空堦客夢
時時惜歸鞍澹澹懷侵尋鷗鷺返花意後期猜

谷林五兄已未夏重游京師未幾歸湖上倦游吟百
餘詩中多客感而一發之當歸八首自敘所引東廣
微補南陔其大旨也按六笙詩爲說經家聚訟之藪

羣言淆亂衷諸聖疇出古樂書而正之若廣微所補居然雅音黃實夫非之似乎過甚君獨取之以申君子勗虔之意何其善說詩耶據選注以白華朱萼爲兄弟則絳趺元足當子姓羣從觀至林園水木詩書友朋則又粲粲磨錯及循陔之采也束氏補亡若爲君作者入之小山詩話洵一佳事若余以六十老翁飢驅惘惘無倦可言視君八詩同者僅得其半則所歆羨於君者正多他日登堂拜母令縣中人以大巢十九簧譜君詩爲壽可乎庚申花朝前二日東壁弟吳廷華拜手跋

愛日堂吟藁卷九

愛日堂吟藁卷十

仁和趙昱谷林

小山續藁之一

次韻查梧岡涿州雨中 途中早飲代門同作

追錄戊午秋日出都口號

庚申春中再出都用前韻

平原道中遇雨二首 荏平道中

曉行見雪 春雨

望晴 述懷二首

道過繹山 梁王城阻風聯句

渡河聯句 舟行爲風雨所阻和代門

無題一絕

三汊河

寒食分賦以趙嘏兩見梨花歸不得每逢寒食一潸然句爲韻得梨字

清明再用前韻

阻風瓜洲

楊柳枝詞三十首

有序

惠山進香詞四首

華孝子祠

雲林倪高士祠

試惠泉代門同作

秦園

五人墓

賦別查梧岡秀才祝韋庭進士歸海昌二首

舟中攜帶惠泉抵家日與代門各分一器

歸來未久卽薄游雲閒寄懷大兄二首

晚泊三塔灣

松江道中阻風四首

訪覺海上人

覺上人答訪

將歸杭覺師贈句依韻畱別且訂西湖之游

惜別效西崑體茸城梅雨重錄一過回憶莫春流連

光景竟等前塵昨夢申紙憮然余懷也

次公壻自閩歸賦詩三首

雙白燕

春白燕

秋白燕

閏月聳翁金先生畱憩小山以耳有復聰之喜賦詩

索和二斷句是政

松谷三兄遺秋鳥

雲門覺上人許遺黃白秋海棠久不見寄詩以督之

白秋海棠聳翁同賦

次韻樊榭移居四首

次韻查梧岡涿州雨中

雨灑征途車軸動曉程初聽汝南雞來經涿鹿雄封舊卻
望燕山客眼低心事春風過馬耳萍蹤涔水論牛蹠笑予
還往長安道歧路茫茫東復西

途中早飲代門同作

殘月曉猶在解寒相倚爐晨雞聽膈膊卯酒勸醅歸路
實云始薄懷殊不孤多君諳舊蹟一一問征途

追錄戊午秋日出都口號

去去關河宿下亭晚延秋意客醒醒三年京洛無他念惟
有西山照眼青

庚申春中再出都用前韻

倦柳長亭更短亭春風吹得幾枝醒重來京洛深懷念長
謝西山不改青

平原道中遇雨二首

雨阻平原一破程行止半道不及常頓謂之破程輪膠蹠滑曉難行麥根

霑潤聞農語已報交流四澤生

宿霧如城雲壓頭闌風閣雨管羈愁一回客子消魂處柳
黯絲絲冷似秋

在平道中

微茫春樹散晴烟一角在山出遠天三日麥塍春雨過斑
斑勻糝綠苔錢

曉行見雪

春雪霏霏似點苔
曉程迤邐散林堆
好罽鴛絹工彈粉
偷取倪黃合筆來

春雨

二月東風作雨愁
如塵如織弄輕柔
春深不遣重簾捲
燈色難禁小閣幽
倦枕支離偏寂寂
征車登頓合休休
冥濛預賦江南景
燕子桃花次第收

望晴

出都未旬日行役
苦多滯一雨朝及
昏四野積陰翳行
行戒且止馬殆更
煩轉矯首辨風色
北吹日多厲明朝
雪又作雪花紛鬣
毳天乎慳此晴勿
爲行旅計翻同杜
郎居直作新婦閉
欹枕檐溜聽近牖
烟樹睇陽烏竟匿
影雙鳩偏

氍

不嘒江南憶春雨
渺瀰汎涯涘勿謂
行路難滑澁阻燕
薊明晦旣不定此
身等繫繫同好以
詩祝雨師謝長逝
春風逗嫩晴一路
歌新霽

述懷二首

年華青鏡裏今者
我嫌吾感遇歌窮
鳥勞生等磨驢事
違心不壯老去術
憐儒甚欲中流濟
千金抵一壺感多
懷抱中寧復與人
同昔昔夢人役搖
搖類轉蓬鼓書閒
甫里金榜重江東
旅舍憑君訴淋浪
春雨中

道過繹山

取次鄒魯郊迤邐
遵大麓泥滑春雨
過曠野寒穆穆朝
行百里外山影勞
屬目停午行孔艱
驅車入山腹俯可
接眉

睫欲往路旋復恨未恣尋討自怯腰腳縮矯首峯巉巖幽
玉削瑤瑤秀拔起千尋杳杳青冥矗扶輿發閒氣大哉靈
異毓吾聞此境界林壑莽回伏書門傳邃古巖竇大如屋
往往嘉遜士於焉賦邁軸當春百卉菲蓊鬱等若木慨歎
失交臂經途空往復

梁王城阻風聯句

三月剛三日昱東風阻客行掀波鯨鬣上汪立避浪鷁頭

橫促膝談深夜查虞羈心對古城明朝聽舵尾祝歸路一

帆輕昱

渡河聯句

清明之明日渡河視方旦昱虛白出微茫啓明東獨粲立

一舟徑南指帆櫓任流泝昌虞波濤動地來溟渤渺無畔勳

遙遙溯厥自云是出天漢昱泱泱納百川掀騰鬣重岸立

白石黯欲匿長風捲不斷昌虞虢虢起震驚浩浩破突驛勳

萬派一色黃石水泥斗漣昱鼎沸難不輟瓴勢建莫扞立

曠然天地閒襟懷殊渙渙昌虞矯首窮寥沆談笑恣顧翫勳

溜入心為怍浪擊目屢盱昱初快弄楫閒復動乘流惋立

不盡自終古脈脈坤軸貫昌虞人生歷險易當作如是觀勳

細思欲窮源荒忽路勿憚昱既識崑崙高取詫火敦誕立

博望槎直上謫仙句可按昌虞疏鑿龍門開鴻濛呂梁漫勳

一曲一千里地畫中夏幹昱或細如綫流手掬可容盥立

或明如練飛長空披倒幔昌虞或閃閃電搖或紛紛星散勳

敢

或漩螭蜿蜒或伏蛇驚竄昱一匯不可制穿碧破危立

九曲歷秦晉圍環束鞅絆昌虞東逝洩尾閭長淮清駛亂動

民力勞宣房瓠子聽歌曼昱汴梁當其衝金墉實首憲立

自古大為防迄今費宵旰昌虞新河侔白渠漕輸資妙算勳

革囊遞急汎葦束敵柔愞昱時愁一浪風不抵千金埠立

禋祀務先河報功虔裸瓚昌虞遐哉西河守投壁光璀璨勳

繫彼公無戒還發可俟歎昱壯懷駕黿鼉健筆壘鴛鸛立

感激發高興相於挈行伴昌虞呼嘯御風行浪花拍天半勳

舟行為風雨所阻和代門

正好青簾白舫居今朝浪阻劇愁予堪憐數米兼謀酒無

賴焚香且讀書向晚人同共命鳥境僻土荒絕無避風舟行跡頗有戒心

作倒騎驢羨他下瀨揚舳客鼓櫂乘流較不如

無題一絕

無情空復渺相思縱使多情知未知細雨寒催桃葉渡春風常倚柁癡時

三汊河

艱難邗上過關吏權纔通風雨春無賴江天思不窮遠帆回佛塔舊柳溼行宮渺渺愁何寫孤懷句媿工

寒食分賦以趙嘏兩見梨花歸不得每逢寒食一

潜然句為韻得梨字

一一歸程記柳枝關心忽到禁烟時寒襟客倦春常中冷炙廚空晚未炊孤艇雨聲聞謝豹故園花事夢棠梨吟情

總爲韶華惜明日清明又要詩

清明再用前韻

花亦傷春瘦損枝清明細雨赴愁時踏青何處餽簫賣乞
火人家杏粥炊綠記篷窻齊插柳雪添雙鬢獨簪梨蕭蕭
冷逼重陽似此景坡翁洽我詩

阻風瓜洲

不信天涯慣滯留今朝風又阻瓜洲地窮淮海千層浪春
老吳儂萬斛愁客面衰紅回盞底江山暮雨壓船頭竹西
歌吹年年是不管繁華寂寞秋

楊柳枝詞三十首

有序

庚申春中挈客出都途閒見柳枝欲舒逮至江

南春已云暮依依近人昔人有詞云闍黃看到
綠成陰春由他送迎旅眼倦留情何能已緣與
汪代門查梧岡祝韋庭各賦南北柳枝詞以致
意焉

春明門外別離人依舊常時陌上塵好語東風齊著力不
教寒勒柳枝新

未放柔條欲折難匆匆行路不相干年來自結春風恨馬
上西山翠色寒

綠意長堤兩行生水明沙嫩弄初晴任他驢背獨吟客烏
帽黃塵去玉京

又見枯楊已長稊細腰無力淺眉低風流盡數靈和好萬

萬長條舞苑西

見說離宮三月莫柳城深處綠雲浮絮飛三尺紛如雪輦
路團成萬玉毬

萬柳堂空柳亦摧秋時共客幾衰回三年重踏京華路壞
壁尋詩一再來

晴烟四望散郊坰羸馬柴車日午停纔見鶯兒黃欲上不
曾遮斷嶧山青

磯頭沙尾一枝枝更愛斜陽欲舞時北地風花幾回顧空
教破費買胭脂

膈膈膊膊候雞鳴二月馬蹏霜滑行鬢鬢柳影月在地客
夢亂同春草生

柔條暖颺綠成接有意低垂拂面過蕉萃不禁春雪點絲
絲持較鬢邊多

千株烟鎖溪旁路半月寒偎社後春寂寂鞦韆閒小院駉
駉裏試荒津

將離惜別意殷勤老我風塵獨對君突兀黃金臺下路空
餘涼月白紛紛

盤紆山徑出巉巖瞥見烟陂瘦影函水上風光遽如許晴
梢高竝數春帆

淮南淮北正依依好伴桃花燕子飛牽率思人憐此樹故
教臨水送將歸

清江喚渡暮潮收欲為蕪城好句畱聽唱柳枝歌已半綠

楊城郭認揚州

右北

絲絲都爲客懷牽春到江鄉更惘然多謝長條拂歸路天涯情思得人憐

楊枝一曲可憐生腸斷江頭擫笛聲春雨吳儂愁似海況逢三月過蕪城

秋菊春蘭與細評底須好事費詩情從今只唱江南好添得一聲花外鶯

到處逢君魂欲銷纖纖著意寫苗條南宗定許王摩詰一片江南粉本描

何堪歲月任侵尋樹已如斯春又深似我吳霜雙鬢改不

煩惆悵綠成陰

閒情隨處惱鶯花花下重門柳幕遮夢破一天烟水闊五湖有客斷歸家

樹抹垂虹橋外烟三高祠下水連天石湖好句還能誦細雨垂楊繫畫船

踈地遮樓舞不休真孃墓上冷如秋閒來六柱紅船小不載吳姬卻載愁

春枝秋枝一例舞長條短條俱可歌小蠻已嫁楊枝去日莫青青喚奈何

深港開門淺住洲水風多處任遨遊鬢鬢倒影空潭裏欲進孤篷繫得不

池邊種柳已鬢鬆慳與清閒歲月供輸卻鄉園飛絮在年來身世任萍蹤

梳梳幽意結爲鄰不種樓臺卽水濱回憶舊游成歷歷兩湖詩社一歸人

雨雨風風自一川婆婆幾惜立江邊憐渠撥得條條碧不買黃魚爲我穿

三千里路吟情共強半春時客子歸他日柳枝歌記取吳閶門外別依依

莫倚高樓遠思含風前白紵試春衫憑君寫盡可憐色除卻斜陽與片帆

右南

惠山進香詞四首

晴春香火賽家家社鼓靈旗盡日譁最好山花隨意插如雲水上拜吳娃

梅檀是處散氤氳金響銅鈺鼓擊鼓未去錫山朝玉帝先過惠麓禱茅君

陌塵雜遯嫩晴天柳放青梢桃欲難一隊邨姑君莫笑扶闌也照惠山泉

提攜少長見醇風報社祈年處處同豈是春游逐駘蕩江南四月起田功

華孝子祠

孝子名寶南齊時人

孺慕瞻遺貌南齊獨行傳終天誰冠字垂髫到華顛世際

千戈裏風持卍弁先千秋論孝潔直竝惠山泉

雲林倪高士祠

芙蓉湖畔白雲夫高蹟相尋意似孤梧竹蕭蕭祠宇在干
戈攘攘室家無九龍入畫應題逸清闕矜人合字迂昔日
風流還憶得龍涎香炙隱菰蒲

試惠泉代門同作

中吳有惠泉清瀉傳空山侵曉孤夢破倚篷認烟鬟同好
徑挈游客權艤春灣名泉七十二品亞中瀝班汲甕纔一
試塵土淨鬚顏滄以龍井芽粲粲白玳環溪聲沸聲裏石
銚傾潺湲相尋味外味舌本得靜閒高松謾謾下殊境獨
往還坡公愛清簡蕭然遠人寰常將好句解漱我齒頰閒

佳哉小雨住良願庶勿慳

秦園

權訪梁溪直到源經過小憩得名園相尋游屐殘花徑祇
有頽山壓樹根野店酒醒憐客倦春帆夢破向誰論猶餘
藻琰

先皇筆常與寒泉一片存

五人墓

斑斑花豔春風熾外朝委鬼濟內壘太阿倒授刑餘人毒
流薦紳闕天醉吳中忠介周公先詔獄雷霆出緹騎公是
公非孰爲持齊民反得奮嗔恚鼠狐城社正紛拏觸忤乖
龍遭不睡五人洵足稱人雄同心駢首直歸視當年忿忿

在一時何暇紛紛論愚知無賴竟獲身後名妄男子豈其
儕類我來墓下草蕭蕭墓門英骨白石閱春秋咸秩匪無
因立懦興頑發長喟闔極之墳燬燕山不教逆氛汙大地
明彰幽輝兩不遺褒誅重典 聖朝誌

賦別查梧岡秀才祝韋庭進士歸海昌二首

塗經慙老馬詩法本先民耆舊聞堪續蒹葭倚更親君才
蜚壯盛我意賸酸辛歸去湖山近相期會面頻

此際殊難別惟詩可寫情伊人春柳似新詠玉臺成時韋庭始

歸未學雙眉畫先題千佛名羨君歸興好把酒更須傾

舟中攜帶惠泉抵家日與代門各分一器

枕流復抱甕客路遣詩情雅有寒泉癖差同臭味生論交

分袂澹調水剖符清穀雨明朝是攜歸好試烹

歸來未久卽薄游雲間寄懷大兄二首

得歸懷抱對兄開忽又匆匆作客來相見艱難惜塵土坐

饒風月把深杯五茸城下人重到三泖湖邊首幾回猶有

牡丹詩未和殘春逋債又黃梅大兄喜予歸卽招看牡丹賦詩未曾報和

此行成獨客况復思依依夢與流波去春纔三月違有情

空往事無語任斜暉一櫂溪山裏花愁人面稀

晚泊三塔灣

憶昔徑過晚今來又落暉蘆根螢火碧塔外佛燈微村酒

潮衰面生風上袷衣秀州風味好五載未全非余丙辰六月北上過

此有作

松江道中阻風四首

舟行已三日茸城悵未到寂寂成獨往身心違靜躁去程遙指東東風偏怒蹙掀颺連晝夜昏黑又雨瀑弱縉不可挽帆腳爲逆倒孤篷避蘆根時時在曲澳何心問往蹟湖波愁陸瑁

策馬憚馳驅登車厭鞦韆五湖今汎汎身世烟波闊田父方墾勤赤足苦滑澁盡日得相於野舍欣所芟順風數來舟帆疾過箭筈我寧怨石郵逆忤敢怛形安旣不移守一意勿奪順逆適所遭斯時聊任達且歌清風詩樂至憂卽撥

憶昨春風大客阻江河行詩語荒涼境篋贖菰蒲聲不謂

賦命薄役役勞我生旅枕夢艱脆孤篷響砢碎嗟彼黃頭郎撈攏白浪橫飽歷翫風濤老子魂易驚東吳一再游句劣五茸雉秀傑九峯青滂漾三泖水此中殊不惡懷土亦洵美不見陸士龍誰似天隨子昔賢足嘯傲顯晦無二理悠哉古井歌不波心事擬

訪覺海上人

斷約少迎送烟蘿住北垞門環一水碧閣倚九峯青好句追禪悅新芽瀹海溟出飲普陀山新茶絕似龍井已充貢品閒分雲鳥跡隨意息巾餅

覺上人荅訪

氣宇雲門傑深聯方外交未來真實語無隱耦奇爻上人精星

學爲子談祿命且善易卜心止蓮生淨經繙貝葉鈔周妻與何肉吾亦解吾嘲

將歸杭覺師贈句依韻畱別且訂西湖之游

重湖白社約主客待成圖亭記泉聲冷詩尋竹徑迂四禪師子縛一語趙州無黃耳迢遙訊還憑陸氏奴黃耳一云奚奴名見

困學紀聞

惜別效西崑體茸城梅雨重錄一過回憶莫春流

連光景竟等前塵昨夢申紙無然余懷也

木蘭舟上自神傷空使春情付斷腸未許風懷歌芍藥無由湖畔數鴛鴦姮娥有恨奔秋月桃葉何心戀水鄉從此柁癡渺天際可能回首憶裴航

次公壻自閩歸賦詩三首

合噉楓亭綠荔來口涎內熱費詩才休論珍竝江瑤柱已

惜寶山空手回

三月杪卽歸惜不及荔枝時

幾片摩挲雲葉光煮傳新試石泉湯何須更覓龍團樣一

盞初分鳳尾香

見貽鳳尾茶數片入鑪沸煮香味始出品殊別也

天下何曾有山水杜陵評畫妙能形武夷九曲真如畫羸得佳篇落隱屏

雙白燕

玳瑁梁棲雪作羣愛他燕燕語重聞輕俚曉夢愁難醒寒竝梨花苦不分似珥投懷隨上下如鷓入幕惜翻翁人閒歲月吟高士春至秋歸祇共君

春白燕

尾歌澁澁不鄰元得草將泥二月天片影正侵珠箔曉一
絲初破杏花烟生憎柳絮荒池外未識烏衣舊巷前自與
樊家評掃粉裁紅暈碧枉爭妍

秋白燕

西飛翦翦弄輕柔顥氣蕭辰玉羽浮繪影名傳海叟句歸
心語向社公愁唐姬粉頸霜痕薄趙后仙裙雪色畱去去
巢空太涼冷月明人獨倚高樓

閏月聳翁金先生畱憩小山以耳有復聰之喜賦

詩索和成一斷句是政先生以耳重聽自號聳翁

老去翁猶識字聰龍從角聽字成聳喧豕牛蟻紛紛遣攜

酒何須乞社公

掀髯吟徹早秋時重省殘蟬過別枝此日因聲還得法始

知聞復是吾師錢塘思聰字聞復見東坡集

松谷三兄遺秋鳥

食指朝來驗旋投羽族鮮海天秋自至莢性熱寧蠲雋永
侔鶯炙輕膏先雀絲吳中風味美饌法訊方傳

雲閒覺上人許遺黃白秋海棠久不見寄詩以督
之

尋花索句費幽懷卻憶禪關實語乖一笑斷腸花信斷阿
師空色付秋堦

竹涼荷淨訪精藍花品從君握麈譚拈出禪僧多白足難

逢黃面一瞿曇

菴中多白者許從他處覓黃者見遺

白秋海棠聳翁同賦

冷穗秋階秀色延幽懷細數已涼天披風欲斷腸如雪有
恨難消淚似鉛澹影正宜山石瘦素枝時傷荔牆鮮別花
兼別紅妝句弗與詩人一例傳

次韻樊榭移居四首

甌甑為障百弓餘便足幽人五畝居慈竹遠山吟昔昔

樊榭

舊有移居詩慈竹窻前扶母到遠山樓上課妻看句

上京南里樂渠渠頻移東野無

多具淨埽焦先自作廬誰主誰賓謀野老以君爭席在樵

漁

清蹈高風已據顛地偏心遠境超僊隨行挂角書千卷餽

屋畱賓酒一船有約卜鄰同卻掃

謂桑伊佐水部

無人攤飯且閒

眠先生更得安居法日課梁閒耘老錢

鄰曲時來取徑斜真同潘岳面城誇畏人小築呼園客過

眼虛聲等散花嶺上白雲高士悅牆東獨樹老夫家裴回

古社叢祠側桑柘陰環遠市譁

甘苦尋論玉屑聞還同味外策茶勲夷門詩境遽如許萬

戶侯封安足云買取疎花矜絕品乞將綠玉看成羣

來乞竹楨

欄南湖舍卻東園占風月從君到處分

愛日堂吟藁卷十

愛日堂吟藁卷十一

小山續藁之二

仁和趙 昱谷林

辛酉元日晴窻折供園梅一枝兼試松石惠鄭宅茶
賦成二首

次韻大兄元夕集小園二首

題代門碧梧翠竹圖二絕句

題桐城張方伯西湖秋泛圖四絕句

冬日謝山枉憩小山意林出荔支酒酌之賦詩和韻
題汪雲尺安西筆記卷卽付其子

蘭臯見示冬日偶吟作此報之二首

園梅先放一枝

壬戌新正病愈曬藥

十日樊榭敬身集南華堂觀薛素素蘭竹卷分韻得春字

試燈夜與嘯峯意林六弟及兒子一清坐石上以何處聞燈不看來爲韻分得聞字

小山方竹去秋已發九竿經冬及春尚未放梢何遲遲也與嘯峯意林兒子一清同作

立夏後二日招同嘯峯六緣司空大兄看芍藥小飲明日大兄有作次韻

次韻意林聞特下永免米豆課稅之詔喜而賦紀意林四十自述四章用余戊申四十所賦之韻仍和

壽之

次韻大兄過南華堂訪桂二首

第三女孫以咽喉疾夭亡時方十二歲

越三日重九四孫仁元亦以喉疾殤二齡孩抱殊增痛悼也

奉懷大兄偕楊子幼江上小住因誦白沙翠竹江村暮相送柴門月色新想清境正同賦寄二首

十月望日園中翫月鮮華皓潔五色重輪生平奇觀也與嘯峯同賦

種蘆

吳大敦復遊京師重得先公所藏宋刻丁卯集題詩

索和賦正

菽乳次樊榭韻

鹽齋樊榭用放翁韻同作

敬身得研山一枚樊榭名以抱雲峯用元遺山雲巖韻賦之屬和

臘月望日南華堂賞雪樊榭敬身二君索蜀石經毛詩殘本廖瑩中刻梓韓集同觀各賦一章以作消寒之會

辛酉元日晴窗折供園梅一枝兼試松石惠鄭宅茶賦成二首

今年喜見故園春折得梅花似故人檢點晴窗書帖子花壺筆格一番新

賦罷椒銘試揀芽三山亞鬪客爭誇兔毛一盞非粗色好
汎清風白乳花

次韻大兄元夕集小園二首

令節團圓集草堂寒梅繞屋竹圍莊閒居每唱棠華咏暇
日常連斑白行檻外疎香分酒盞樓頭明月敵燈光新年
已賦山中樂更寫新詩入錦囊
別墅先人創闢來每懷風木怕重開卽今處處搖春柳依
舊年年長碧苔蠹簡空教遺澤在壽萱猶喜北堂栽今宵
幸藉諸兄至共賞華燈當舞萊

題代門碧梧翠竹圖二絕句

矮竹高梧位置成圖中一老匹雙清蕭蕭寫出涼秋景頓

令詩人眼倍明

問旗沽酒憶相親敢許吟鞭作後塵斷句柳枝三十首一

披風貌隔年春

記去春出都同舟唱和事

題桐城張方伯西湖秋泛圖四絕句

每首末句用坡公詩

蒼烟淡淡染秋山夜色川光指點閒一舸湖中公事了古

來靜治得清閒

楊枝常伴朝雲侍蘇白風流歌且謠貌取截湖烟艇子獻

花遊女木蘭橈

圖中畫舫姬人作清夜遊

冰壺月上境如仙水枕憑衿卷裏傳底事遨頭浣花日晝

橈鼉鼓聒清眠

玲瓏歌贈記遊蹤簿領抽身不易逢一半勾畱今日是青

山許我定相從

冬日謝山枉憩小山意林出荔支酒酌之賦詩和

韻

側生風味好斟酌撫杯中小閣初拈碧南天憶噉紅華胥

昨夢過燕市酒人空

昔年作客京師謝山意林及家司空令貽秋泉東壁西顛壻次公從子裕

清秉彝諸人今或散去或有逝者言之愴懷

吾欲時謀醉頻攜粵客筒

題汪雲尺安西筆記卷卽付其子

平生數密友到君屈一指等輩無足奇君才獨具美庸庸

故多福君乃以才累憂患了餘生政坐識字始荷戈萬里

行絕域恨填委懷哉我友賢攬古錄前史中途記所見盡

此尺幅紙安知草草心淚掬西涼水伯郎蒲桃酒一斛換

刺史夫君豈其倫要在立功耳當年柳柳州牽引任訾毀
一謫竟十年語工益可喜雷砮而電射霧露櫻輒死文章
擅聲價千載誰與擬老眼供摩挲感歎再三起斯言或可
徵藉復通家子

蘭臯見示冬日偶吟作此報之二首

料理冬心感歲時江鄉滯跡竟何爲鏤成楮玉三年技羸
得冰霜一卷詞已苦空逃紛眼底還憐瘦損臄腰支語君
莫漫悲歧路且向楊朱證本師

郊原搖落劇憐清冰鷺潛魚兩不爭我正漳濱臥病日君
真飯顆苦吟生敬眠酒盞移時醉朋比熏爐永日清待賦
消寒九九會幽人琢句獨琮瑋

園梅先放一枝

一枝暖放足清魂晴日風香竚小軒疎似故人重會面冷
同孤客悄無言侵晨竹外初分白亭午蜂前特地喧盡日
柴關客不至花開祇合獨攜尊

壬戌新正病愈曬藥

愁病相兼半載強安閒今果是良方新年晴日光開戶舊
裏靈苗暖送香世鮮奇書尋藥對人誇妙手敵醫王微生
總戀春和好緩步斜陽正不妨

十日樊榭敬身集南華堂觀薛素素蘭竹卷分韻
得春字

朋輩草堂集相於節物新麗晴穿蜨徑老嬾別花人不盡

南華意空餘舊院春韻拈分榻賦次第敢先賓

試燈夜與嘯峯意林六弟及兒子一清坐石上以

何處聞燈不看來為韻分得聞字

晴試春燈甲煎熏晚來衢巷自紛紛魚龍百戲從人看簫

鼓中宵是處聞倚檻寒梅邀薄酌當頭碧月遣浮雲年來

卻掃支離甚與客清言到夜分

小山方竹去秋已發九竿經冬及春尙未放梢何

遲遲也與嘯峯意林兒子一清同作

曳杖珍方玉參差數九竿挺梢秋律晚裏籜雪風寒蛇蟄

頭常縛龍神尾屈蟠此君圭角異何日看檀欒

立夏後二日招同嘯峯六緣司空大兄看芍藥小

葉

飲明日大兄有作次韻

紅藥當階翻如綬垂若若疊種置小山扶闌宜茵閣香姿

何窈窕五色眩紛錯棄接花自繁頭重枝憐弱討春惜居

後幽尋此棲託相將覓同調寧能事獨樂來招舊雨歡兼

與阿兄約晴雨勿愆誤栝盤預參酌詩壇便集字晚廚輒

覆幕魚笋得鮮新豆莧羅昭灼百壺期無量小戶時忖度

有客竟逋逃兩兄暫聯萼

六緣以他事去松谷崑麓兩兄適至亦不畱坐瞥見榴

枝開又翦蕉衫著鄉園今把翫雜塵憶飄泊品稽劉郎譜

雅贈豐臺謔馬耳過春風依稀花事昨

次韻意林聞 特下永免米豆課稅之詔喜而賦

紀

去征大號渙霆雷是處關津恐後來辜權濫觴初釀禁汎
舟通濟緩民財詢兼耗羨金門策議減常平碩畫該未雨

綢繆

明詔疊殷勤賡拜屬良哉

時殿試以耗羨發策悉不稱旨復博訪在廷

言官有所對非所問者切責之吾鄉孫虛船侍御條請減糴官米以紓民困疏下廷臣議奏

意林四十自述四章用余戊申四十所賦之韻仍

和壽之

兄弟無聞歎後時東西屋占惜分支同居楮刻三年技顧
我壘攜老大吹荏苒流光尋舊韻蕭寥秋興琢新辭駐顏
莫謂愁無術最後鞭羊卻正宜

頌祝金飈玉露中列編華萼愧難工句拈春草聯幽夢花
發小山香舊叢奉母攜兒成綵戲延秋駐景荷涼風余年

五十還過四差喜嘉辰壽阿同

消磨歲月祇風情世味還憐似水清擄腹詩書荒白首摘
髭科第昧平生雁心耿耿三秋在屐齒年年幾兩行占斷
寬閒棲永日無名何用更逃名

似余身世轉蕭疎意迕時乖百不如幾度塞翁憂失馬五
年京國笑騎驢憑君壯歲酬先志殖學分陰愛日初況是
有兄皆白髮不徒難老慰平居

原作

信

四十無聞老大時罷求名利計年支明廷燕石非真寶
廣樂齊竽亦濫吹強仕未成枯樹賦愛吟會有小山辭
流光漸杳觚棱夢散帶披襟閉戶宜

我生最愛是秋中滿眼清華點綴工殘月尙遲晨露薄
新涼欲破早香叢棣花鄂鞞昭如雪萱草金英不染風
富貴無緣身散漫此心擬與白鷗同

于今將斷羨魚情自覺悠然懷抱清吻頰未膏千卷澤
頭臚已見二毛生難蠲婚嫁塵氛累多悔關山辛苦行
卻勝襄陽遊興早閒居空笑孟亭名

顛顛容華意嬾疎畏人小築樂何如安心不逐追風驥
棲迹徒巡負醋驢歲月百年將過半池亭一夕已涼初
弟昂相見回回老好詠南陔奉母居

次韻大兄過南華堂訪桂二首

裙屐經過處相於晚桂天尊香倚石久數蕊寄懷偏小草

花翁伴

謂嘯峯

長哦白傅仙林泉如許樂底不賦歸田

風懷殊蘊藉鬪飲每邀賓放艇羊求共登高兄弟親

并訂重九

登六和塔

談深忘世事坐久屬閒人不盡當杯意無妨語笑真

第三女孫以咽喉疾天亡時方十二歲

蘭質云凋謝良醫鮮十全弱齡摧似玉老淚瀉如鉛刺繡
鴛飛臙朝昏母哭連長安書未寄爾父獨相憐

一清住京師未回

越三日重九四孫仁元亦以喉疾殤二齡孩抱殊

增痛悼也

忽又桐枝損侵頽痛老夫未教勝竹馬先已失童烏茱佩

秋風惡甘分雁影孤

式清所生三元孫與仁孫同歲常時抱侍左右今忽失一不勝淒悵之甚

重泉依姊弟孩乳泣呱呱

奉懷大兄偕楊子幼江上小住因誦白沙翠竹江
村暮相送柴門月色新想清境正同賦寄二首

林邱歸臥有閒身結伴江邊到幾巡歲晚空村黃葉盡霜
天二老白頭新葦閒是處逢漁父澤畔相尋得散人試上
浮屠一觀海孤雲兩角望無垠

大兄重九日獨
上六和塔登高

翠竹白沙霜夜月一鉤初上畫難成人經冰雪年華改韻
繼江潮嘯詠清已遂雲山麋鹿性不寒泉石鷺鷗盟論量
風月真無價豈特千詩萬戶輕

十月望日園中翫月鮮華皓潔五色重輪生平奇

觀也與嘯峯同賦

霜冷上天月姮娥五色誇重輪分紺碧淺暈極清華望久

織阿御乘同八月槎光輝誰與敵不礙喬雲遮

種蘆

大好延緣在葦閒病夫今爲一開顏霜根不似官家養

官家

養蘆花爲
荻見晉書折葉時分小閣閒寒鷺冰池來伴侶曲碕淺碧

護清孱無端牽動江湖思便有詩人約往還

吳大敦復遊京師重得先公所藏宋刻丁卯集題

詩索和賦正

故人繡谷翁素業今有後插架饒萬卷郎君能密受昨歲
賦北征目擊心慘愀一編手澤新故物爲吾取歸來屬流
咏父客若某某遺書重丁卯感逝在癸丑雲烟洵過眼聚
散無乃偶身沈名自飛家禪學業久太息予索居賤老邱

樊守五載京國遊躋躋風塵走還將舊雨尋室是人琴否
瓶花坐空齋老藤延几牖憶翁耽典籍愛護等瓊玖往往

許假鈔校十得其九叢書精審過運管勘不苟繡谷主人藏書悉手

校精本頗矜惜不輕借人獨許予鈔予所藏多繡谷亭本予偶得善冊先生見之亦必取以勘定書跋於上檢閱故人遺墨對

嗟哉衣食謀勿為飢寒詬吾亦示兒曹制矩緬增感

良友誠以蒲公言三復真不朽蒲傳正誠子弟曰寒可無衣飢可無食至於書不可

失一日

菽乳次樊榭韻

誦君菽乳什雋永抵言鯖寄懷蔬水中幽愜難為評領此
味外味微音琢句鏗挹之以入饌香甘逾青精合伴莪藿
進不與膏粱并晨溲竈觚淨夜汲井華澄下匙畱犁滑漑

舖玉顏頰數錢謀煬者挈筐於以盛野人饜滿腹王公啜

大烹儀禮註王公熬豆而食曰啜菽淮南方士術黎祁詩老名嗜好殊世

尚澹泊衛吾生馬潼及杏酪設鼎粲竝行長齋王子野對

之有餘清憶昔客燕市土物徵都城甜漿賣坊巷蓐食供

娃嫵旅人飢腸慰蒸豚嗟奇羸一餉樂無事歌擬金石聲

人欲胡可極口噤復耳營

鹽齋樊榭用放翁韻同作

陽溫十月遲青霜嘉蔬繞舍經秋黃秋黃之蔬見七發談經時為

檢月令先以鎌劔次蓄藏綠葉覆甕形鹽白嫩甲冷齒冰

菹香崔實四民月令九月作葵菹其歲溫即待十月註菹醃菜也頰肩巷陌千擔壓老

圃健傭一冬忙甫里忍飢作小賦顏生晚食巡空廊不獨

齊民稱要術凡百士夫尤須嘗不干食肉無鬼賤何煩華
錯開高譙豈真三月食無鹽萁茗要同薑豉薦連朝霧暖
釀雪天明年又作炊餅麵飢腸火迫笑老饕木奴魚婢俱
入傳陳簡齋食齋詩冰壺先生當立傳木奴魚婢安足錄

敬身得研山一枚樊榭名以抱雲峯用元遺山雲
巖韻賦之屬和

錢塘幽士駐清顏城南卻掃隔往還病餘嗜古獲二雋摩

挈興槩凌江山聞併得宋高孝兩朝賜楊和王御札石刻奇石如畫供眼底一

片黝皴面疑鬼從今抱雲新與號能令米顛到狂喜環以
瘦腰一線雨掃痕安得白獼髓前賢險韻分角和詩力退
舍三十里鍾隱道人珍碧嵌青峭數峯欲浮嵐宣和天子

墨本

愛秀傑山高月小鐫巉巖君亦齋心塵垢祓夕弄烟波朝
雨沐相將更有石虛中攻錯忘形几案物頻呼作丈再拜
尊仇池疊咏索詩人此子正宜置邱壑始信閒身樂事真
臘月望日南華堂賞雪樊榭敬身二君索蜀石經
毛詩殘本廖瑩中刻梓韓集同觀各賦一章以作
消寒之會

朝來雪作同雲天萬玉妃舞裳翩翩南華堂中客繼至際
此冷淡消殘年蜀經韓集出二妙清談雅辨聽蟬連自來
紀石經有七碑洞今祇開成全那知俗本轉繆誤毛詩空
使標鄭箋開成石經毛詩卷首標題有鄭箋而實無康成一字蜀石本卻有箋註小字校明南北雍刻梓
其閒字句正誤甚多恨不見全經也遺經廣政惜斷爛二南賸止邴風篇調

朝恐鞠文義異淆訛同立肖烏焉更指缺畫避廟諱唐家

厚澤深如淵後蜀石經於高祖太宗諱皆缺唐之文章自畫唐之澤深矣王深寧嘗言之

韓始亦多善本爭流傳唐之古文自韓愈始坡公語也韓集有閣京蜀杭石諸本是刻

攷異尊朱子采經證史窮精研世綵堂遺廖氏印古香把

翫工雕鐫世閒神物不常有往往書冊空垂涎寒山金石

重繙討謂在咸陽覺宮前吾於斯語敢盡信急思撫揭豈

其然寒山金石林云蜀石經在西安學宮其舛繆如此又聞韓氏有家集親書繭

紙如雲烟昔人何幸得觀此浮休良慰三生緣研北雜志長安安氏

舊藏退之家集二卷繭紙正書有退之親自改定字後為張浮休取去予也所寶希世有日

夕對之忘飢眠客亟催詩起白戰奪吾幟矣衝中堅

同作

厲鶚

園林蕭瑟雲模糊鞞角相與尋清娛南華堂前好水竹

梅枝橫出爭盤紆六花高下舞巖岫似聽蟹爪行殘蘆

頃之灑粉漸照坐馳裘烏帽主客俱分茶說餅解寒色

天生一幃重屏圖凋年似此頗不惡况觀寶刻開香廚

孟蜀石經僅一卷張紹文筆嚴形模周南疑誤辨朝字

月令注釋亡哥奴毛詩儀禮禮記俱校書郎張紹文書禮記用唐明皇刪定本以月令為第一

李林甫奉勅注秋壑翹材有首選特築世綵臨西湖

雕鐫韓集稱善本紙墨精好久不渝降王狎客兩寂莫

等為亡國夫何殊流傳幸有經籍在千秋差免謚至愚

武林城中十萬戶織兒綺榻圍溫爐雪中那得二游合

冷淡生活笑異趨詩成喚起鹿門子任徐今不居東吳

丁敬

半閒狎客淪亡久蜀國降王亦烏有紅羊換劫黃塵飛
遺物驚看任人手百摺麻箋如梵笈一卷毛詩出鐫勒
寫自祕書張紹文校經博士孫逢吉雍都舊本餘面目
義析調朝半猶得中間古印辨不真慘沮疑殷戰爭血
吏部韓公筆如虎驅走六經天織組當時雕刻世綵堂
精妙也能珍策府宵人作事閒有補添得泰山一坏土
休嘲家國付渺茫從古興亡那堪數說詩今無匡鼎來
文章真訣誰起衰古魂空使巫咸招但見荒冢翳枯苔
杜鵑口血千山紅葛洪嶺下悲秋蟲不用摩挲歎陳事
且看疎雪舞天風

信

半生嗜古窮搜羅往往祕冊親摩挲物雖自是聚所好
其奈儉腹未讀何良朽蟬斷供讎校青編同勘招客過
城東南隅借二妙視書具眼明差訛璫街急景肯還往
談經說史如懸河空堂微霰響竹白喜無他好賡詩哦
消寒吟罷出鑒賞竹帛金石光遮那蜀經殘本字清謹
二南雅化垂編摩法書斲石號雙絕洪評王品誠金科
蜀石經毛詩乃張紹文書張延族鐫
宋洪文敏王深寧俱有石經評證韓文元本惟六經
起衰八代功巍峩廖氏世綵堂開梓古香瘦畫無譏訶
一朝把玩兩墨妙寒家稱數樂事多嗚呼人壽能有幾
獨傳風雅名不磨蜀國已亡宋社屋徒令覩物生悲歌

高齋歸去各分賦苦思莫踏雪滿鞞

愛日堂吟藁卷十一

愛日堂吟藁卷十二

仁和趙昱谷林

小山續藁之三

雪後池上偶成二首

親家尚書郎姚海門夫婦相繼徂謝輓詞二首

大兄獨居湖上偕嘯峯意林相訪意林有作次韻二

首
觀荷感事七絕句

哭姚氏第三女二首
坐西池看荷悼感亡女

六月廿六日天目樓最高一層雷震柱牖有碎裂處
而樓依然無恙亦絕無焦灼之痕書此紀之

贈吳興潘繡野學博二首

西池

次韻查梧岡秋日登瑤臺見懷二首

雨中過句曲外史墓道蔓徑荒烟杳無尋問漫賦三

首

椶筍有序

嘯峯疊前韻見示予以坡公餉殊長老廣其旨疊韻奉荅

嘯峯三疊前韻有廣種當匹成都桑句予復疊韻爲老饕解嘲

堇浦歸來予未有詩相贈今同人賦椶筍詩疊韻不已每誦坡公問君何事食木魚烹不能鳴固其理旨趣良深卽推詩意四疊韻奉正

次公壻示和椶筍詩云觀本草載椶筍有小毒坡公

所用蜜酢正可制之恐用糟不宜也今之鹵莽一試不幾爲謝仁祖所嗤耶五疊前韻

堇浦以小隱園集見示內有南華贈詩云新婦三言原太早飲醇那不學陽城諷諭耶抑正言耶六疊前韻
樊榭納姬廣陵寄詩二首

謝山從廣陵來訊知樊榭以河堰未開風雪小住有詩戲之同賦

謝山畱憩小山數日言歸四明賦此志別

樊榭竟以河阻不歸畱廣陵度歲再賦一絕句

贈嘯峯

立春後一日大兄湖上寄遺土步賦謝二首

大兄湖莊度歲奉寄盆梅山茶并小詩二首
素心蠟梅四絕句

甲子元日奉懷大兄湖上用坡公甲寅元日寄魯元
翰韻

人日讀玉溪生春日坐懷詩卽和其韻

嘯峯見示困酒自嘲詩次韻

復疊前韻示我再和

嘯峯仍用困酒韻連作二篇辱示齒頰津津興殊未
已予亦再賦荅之

試燈前一日介眉樊榭堇浦敬身曦亮敦復集南華
堂觀流求官工墨譜用山谷韻同賦

購得宋槧西湖僧智圓閒居編樊榭借觀仍用涪翁
韻見示同賦

雨止坐松石閒

正月十六日第二女病故哭之

又雨中感悼陸氏女二首

華亭東門外尋袁海叟墓

客中

薄遊雲閒攜竹蘆帚以歸自嘲二首

重登烟雨樓

次公壻以秋鐙佐讀圖索題吾女逝世將匝一載展
幘淒涼重揮老淚聊和韻書於闌道

哭鐵巖大兄三首

次公壻北上志別

山友過訪卻寄

可歎

漢銅雁足鐙歌為邗江馬秋亭半槎兩兄賦

和敬身同樊榭賦宋宮秋望用錢曲江韻

雪後池上偶成二首

癸亥

雪後清寒坐水軒水真淥淨愜吟魂天公莫再慳花信已

數春風第四番

高花誰為惜摧殘凍蕊冰枝徹骨寒消卻茅簷三尺玉逆

風相送白旃檀

親家尚書郎姚海門夫婦相繼徂謝輓詞二首

寂莫郎潛日旋悲蘊藉希孝梅春物黯宿草淚衿揮巷哭

聲相接官貧世與違含香有令子家祿繼清徽

天水閨儀則

夫人子宗女

姚郎世德求相於從地下零落共山

邱雙紉春城遠同歌蒿里愁起為姻族誄婉嫵著旂旒

大兄獨居湖上偕嘯峯意林相訪意林有作次韻

二首

年來過眼幾浮烟散髮行吟即是仙湖曲風光今有屬孤

山相對足安眠

何煩春夢阿婆禪物外閒心不繫懸風雨一篷相別後獨

尋漁父好浴緣

觀荷感事七絕句

重識仙妹幾歎嗟紅鈿翠靨轉相誇道人未肯風情減不

西池添

覺秋來兩鬢華

南華堂外水環流添得空亭是處幽坐對生香原不改重尋舊月故園秋

岫懷遺像展亭東落月紗廚影即空畢竟荷花誰作主蕭

蕭風木畫圖中先嚴影堂於風木盒中奉香火

西湖元是吟詩好禪子閒來退院多天雨曼陀花世界涼

恩先施病維摩大兄病瘡湖庄不獲入城同賞

相於春草夢生時得句還催小謝詩今日兒童好頭角老

夫年髮只如斯與意林昔年讀書園中花時吟詠今諸姪俱能習舉子業課試小孫輩亦嫻記誦

彈指前蹤夢幻如故人曾為譜詩餘若能泉下傳花信池

只栽蓮不種魚昔年養魚食荷且盡故友吳君繡谷以截荷養魚填詞相戲

沈郎欒城感逝逾十載符子葯林為官久不歸五月邗江回客

權論詩花外發清機樊榭薄遊廣陵歸來過存談詩竟日

哭姚氏第三女二首

有女天年奪秋來招爾魂人亡北墅室愁永大姚邨息影

扶牀子慈親病目眇如予又衰朽頭腦益昏昏老妻年來連夜哭之子患頭眩未愈

頭風非內熱一誤進寒瓜半夜聞妖鳥前庭逐鬪蛇國工

醫鮮術小愈病尤加解識龐居士吾生果有涯

坐西池看荷悼感亡女

正惜鄉關舊事非蘭芬忽感一叢稀花開水面還重見人

逝秋風竟不歸詩識藁砧腸斷句次公喜誦王次回疑雨集絞衾阿母

嫁時衣老夫閒卻臨流臥冷雨蕭蕭入莫扉

六月廿六日天目樓最高一層雷震柱牖有碎裂處而樓依然無恙亦絕無焦灼之痕書此紀之

苦遭伏雨又闌風卻碾深蟠震聵聾天目危樓枝觚杌西

峯掣電竟長空忽驚破柱靈窿逼欲辨飛書緒月工賺卻

當年曹吉利漫因失箸誤英雄天目山西峯有雷神居之見咸淳臨安志

贈吳興潘繡野學博二首

西湖詞宿數文雄覺舍清齋臭味同卻幸海天深化雨何

因講席次春風名高翰院文章在盤照先生苜蓿空媿我

懶成嵇叔夜漫勞青睞振飄蓬

秀朗風神心自傾恍同裴楷玉山行丹臺乩卜三生異外

史官銜一樣清賦出詩篇追俊逸興來筆勢妙縱橫前身

可是貞居子吏隱還遺物外名君為予言昔請呂祖降壇云汝前身乃張伯雨也因

誦外史詩從稱外史是官銜句今秉鐸海昌時謂此官為外翰將無同耶為之一笑君善書深得外史筆意

次韻查梧岡秋日登瑤臺見懷二首

誰顧驪黃冀北空感君懷念託歌風海天棲息憐公子湖

上相思對若翁尊甫星南先生曾伴吟身車馬路憶同秋被醉眠

中柳枝絕唱真無賴分手吳閫悵客篷

已定升沈可強求倦遊末曲橐褰收秋零病葉今如許子

來抱病無聊晚抱寒蟬得似不風什陰鏗難屬和鄉關庾信祇

工愁年來畏影身棲蔭百事空嗟劍刻舟

雨中過句曲外史墓道蔓徑荒烟杳無尋問漫賦

三首

溪聲環玦響仙韶冰雪詩魂何處招漫省雲霞清夢遠春風吹醒玉鉤橋

風篁嶺上白雲閒未許山民瞰閉關一煞前溪風雨合恐同簪硯落人間

當年弟子進侯芭詩法山邨石隱家細雨霑襟憑弔候蒼荒一例感棲霞

外史出山邨之門山邨墓在北山棲霞嶺亦不可復問矣

椶筍

有序

園中有椶櫚數十株暇日課園丁剝取椶毛膚中有筍坡公賦椶筍詩以木魚擬之倣其烝熟蜜酢之法施以醬及糟而食之洵南方佳味多

有不知者為和原韻索嘯峯意林同賦

椶櫚影蔽青鸞尾膚毳剝取勅奴子寒蔬附譜贊寧僧南

中亦識風味美饌法無須問老饕予自不為勸學死

謝山今秋

許子製椶筍及梧子醬法盤空一笑語坡翁緣木得魚有是理

嘯峯疊前韻見示余以坡公餉殊長老廣其旨疊韻奉荅

結束椶毛握塵尾拈來佛法無多子香廚苦澀供伊蒲崖蜜一攪醍醐美宗風清儉付藥山繞腹三篋常不死是魚是筍兩無礙真實試參果菰理

嘯峯方患河魚之疾斷酒肉故以藥山事戲之爾

嘯峯三疊前韻有廣種當匹成都桑句予復疊韻為老饕解嘲

山上染指思進尾朽瓜黏壁白魚子造物幻化得句參蔬
筍氣壓河魴美寒宵月上與客嘗曠哉此樂古無死障泥
胡盞皆可食吾儕小人善修理

堇浦歸來予未有詩相贈今同人賦椶筍詩疊韻
不已每誦坡公問君何事食木魚烹不能鳴固其
理旨趣良深卽推詩意四疊韻奉正

丁則爲枕丙爲尾出鯁去乙問漁子冷官原是上竿鮎式
食庶幾園蔬美無謂不材終天年龍門之桐半生死木魚
烹同主人雁此中出入觀頤理

次公壻示和椶筍詩云觀本草載椶筍有小毒坡
公所用蜜酢正可制之恐用糟不宜也今之鹵莽

一試不幾爲謝仁祖所嗤耶五疊前韻

河豚之毒等蠱尾殺人多在肝與子今也椶魚亦有毒妙
解安州食蜜美從來五味腐腸胃過則爲殃皆可死養生
亟須檢藥議似菜作齏醫得理

堇浦以小隱園集見示內有南華贈詩云新婦三
言原太蚤飲醇那不學陽城諷諭耶抑正言耶六
疊前韻

臨淵三鉤畏鱷尾鮫宮莫誤觸龍子彈鋏長歌食有魚萬
事破除飲醇美樂取天真以醉全醒來不爲墜車死三言
新婦固宜遲胡獨未聞棗修理

同作

全祖望

櫻絲微頰如魴尾櫻筍嫩綠如龍子舊譜曾傳崖蜜良
新製更出糟邱美主人夜半動危機鳴耶否耶均一死
木魚非魚饜老饒白馬非馬有名理

樊榭納姬廣陵寄詩二首

定定桐花暖鳳幃依依邗上效鴛飛詩人舊價公言在新
解風流有綠衣

春暉寸草愜深情定許珠胎明月生亦有流黃中婦織鶯
鶯燕燕各卿卿

謝山從廣陵來訊知樊榭以河堰未開風雪小住
有詩戲之同賦

隔江艇子雪濤喧山館寒回笑語溫試擬王家新樂府歸

來何似賦桃根

同作

全祖望

一笑三年尚可畱況逢風雪阻扁舟閨人正戀卿心重
且爲郎君唱莫愁

謝山畱憩小山數日言歸四明賦此志別

辛苦羊頭一兩車風饕雪虐正還家人生飄泊憐蓬轉客
路侵尋逼歲華寒月深杯嘗臘酒重江健步挈山茶

買雜花數

十本攜歸殘年歸及春閨早點檢吟裝選句誇

樊榭竟以河阻不歸畱廣陵度歲再賦一絕句

廣陵潮信竟侵尋一水遙憐深復深憶著鄉關還小住溫
柔鄉底語鄉心

贈嘯峯

化雨春風久先生杖履閒歸擔花數本新僦屋三間小別亦惆悵重期共往還合并羣紀似投分豈云慳

立春後一日大兄湖上寄遺土步賦謝二首

西邨隱窟認西冷歲晚深杯只自傾冰斷試叉鮮可得會無五嫂饌魚羹

湖山詩興逗春前湖上閒居樂歲年買得湖中新土步殷勤遺我不論錢

大兄湖莊度歲奉寄盆梅山茶并小詩二首

吾生何似卽無愁膠擾人間世味休一臥滄浪踪跡遠殘年夜雨聽湖樓

濠上我還知我樂柴桑吾亦愛吾廬江梅春淺山茶冷合伴清容小閣虛

素心蠟梅四絕句

臘水清心冷護枝國香春伴澹相期晴蜂午鬧真無賴誤釀花房白蜜脾

禪關更領味外味三素薄雲紙閣遮欲識瞿曇真面目不妨回施作天花

蠟兒喚出舊芳聲素素新添錄小名姝瑩自憐人不見強居梅媵意難平

寫生崔趙難工畫賦物黃陳亦少詩欲語芳心何處是一輪孤月夜分時

甲子元日奉懷大兄湖上用坡公甲寅元日寄魯

元翰韻

椒銘柏頌語陳陳別寓高吟入手新梅信頻催先得句屠

蘇自飲不爭春丙辰田獲淵明志甲子書過絳老辰大兄歸田

在己未今年七十有七誰與西湖閒作伴段家橋外斷無人

人日讀玉溪生春日坐懷詩卽和其韻

獨遶池西日數巡侵尋五十六華春老拈金勝渾無計晴

放梅花不負人未易鄉稱衣食足漫招頭責鬢絲新青袍似草

年年定白髮如絲日日新義山句也從前幾誤桃源路漁父於今莫問津

嘯峯見示困酒自嘲詩次韻

語君休止酒請損是良方陶令獨知趣次公嗤醒狂付天

謀小酌中聖快臨觴痛飲卽名士何須頌國殤

復疊前韻示我再和

一生憑斷送服食抵仙方形醉神寧醉詩狂酒更狂僂僂
纔五斗嗑嗑漫千觴不識栝鐺物彭年直等殤

嘯峯仍用困酒韻連作二篇辱示齒頰津津興殊
未已余亦再賦荅之

形骸寄杯酌一笑破觚方弟子遶牀避先生落帽狂拚將
身作甕不憚羽浮觴箇裏天全得遑云中下殤

吾師惟痛飲舍卻更無方劉裕按盧勝知章騎馬狂篇篇

皆有酒六六記行觴君自謂今年一月閒大醉十二次糟

肉論堪久孔羣非天殤

試燈前一日介眉樊榭堇浦敬身曦亮敦復集南
華堂觀流求官工墨譜用山谷韻同賦

試燈風裏吟翻紙立韻賦春何所似揭來眼底獲異書象
胥從譯陳元子一髮澎湖島色寒萬里車書越海山奇伴
東鑑吾妻鏡亦置方程伯仲間

同作

張 燾

誰傳墨法畱海紙

倭僧畱海紙
陸魯望句

方程遺譜略相似和泉

官工松井生

作譜者和泉掾松井元
泰官工彼國墨工號也

精能獨擅無餘子

春燈初試春風寒朋簪雅習比玉山殊方異書共諦賞
乍若琛寶來人間

吳 城

縱橫千挺紛在紙品式熙寧宛然似東夷墨法罕流傳
妙手官工松氏子手中斗覺翠光寒一編遠度來中山
主人好事慎藏弄興寄蓬瀛咫尺閒

購得宋槧西湖僧智圓閒居編樊榭借觀仍用涪
翁韻見示同賦

文字未除蠅鑽紙舊本購珍北礪似

叢書樓有宋
刻北礪集

西湖菟

隱又高僧妙喻南華苾芻子詩盟白社幾曾寒咸平處士
尋空山

集中多與和
靖往還之什

寥寥清韻孤絃絕戛響梅廳冰雪閒

原唱

厲 鶚

緊薄無痕知宋紙高人獲之球璧似開槭處處見西湖
瑪瑙院僧中庸子閒泉幽徑蹟荒寒湖波依舊繞孤山

春來懊惱連天雨開落梅花溼翠閒

雨止坐松石閒

花色闕叢陰罨烟吹不上晚雨忽小住山豐賸寒響意行
踏石橋鈿香惜屐繡遐哉西溪路坐失理孤榜

正月十六日第二女病故哭之

誰云生樂代涕筆誅春前十載梅花劫

甲寅正月嫁去憶敬仲壻初臨館於

南華堂梅花正開今又值花開時吾女祖謝有如昨夢

三生彈指禪情何能已已痛

復自年年

前歲孫女并小孫夭亡去秋姚氏女身故皆作詩哭之

雁字中淒斷慈帍

淚徹泉

沈宛君哭女紈紈小鸞詩淒雁斷非字

散花灘路遠梅月幾招魂醫誤六州鐵腸迴三峽猿語真

兄作傳

姚氏女已命一清作傳今又命紀之

腹痛我無言宅相占他日羊家

有外孫

又雨中感悼陸氏女二首

明珠指掌失有淚掬如麻酒劣春寒中情鍾老淚加曉來
吹凍雨檻外惜疎花兒女青紅數衰頽重歎嗟

暝色黯人意溟濛花徑深雨聲淒入骨眷屬劇關心夜永

春城隔燈餘雪鬢侵栽培憐小草詩句費追尋

元遺山嫁女詩云松

閒小草栽培穩掌上明珠棄擲難吾女嫁時亦曾有詩撫今追昔痛念不已

華亭東門外尋袁海叟墓

閒尋荒冢挈僧行翠竹新抽綠水生白燕風前飛不見空

餘蔓草寄詩名

墓前相傳常有白燕飛來

客中

愛日堂吟集卷十二
相兼愁病出門難海國風多四月寒五載茸城今又到一時身意得輕安

薄遊雲間攜竹蘆帚以歸自嘲二首

但掃清風不掃愁千金敝帚亦何求年來竟作閉門客猛省紅塵又白頭

詩寫貧家淨掃工白閒蓬室臥衰翁漫除埃墨無他事竟日相須伴敬通

重登烟雨樓

青蘆葉葉雨絲絲烟雨樓中此景宜回憶昔年涼月墮五更殘夢立多時

次公壻以秋鐙佐讀圖索題吾女逝世將匝一載

展幘淒涼重揮老淚聊和韻書於闌道

彈指蘭摧等六如病魔多難歎於於魂歸不識西溪路應誤秋鐙聽梵書

哭鐵巖大兄三首

宅卜卽山遠魂遊岱嶽初

三朝崇眷遇六載賦閒居秩謝當歸亟憂先矢報虛他時有南史遺直可能書

舉宗先孝弟羣季有兄心廬墓三年思常華幾度吟

賜書緘在皮素業舊攜琴祇爲休官晚南山息影深

吾實憐多病况今無復言人亡餘涕淚雁斷問乾坤詩句湖山永風流耆舊存天平誠不弔何處賦招魂

次公壻北上志別

此去燕臺繫我思金閨名彥早相期曾將秋柳工描畫又
向紅情惜別離靈照坐禪身等幻玉溪有恨淚如絲他年
若動鄉關意莫忘西窗翦燭時

山友過訪卻寄

先生荏枕得心安兩鬢商顏歲月寬老去何妨讀周易人
閒憂患不相干

可歎

可歎支離百事荒何能短髮更心長藥鑪棄置時旋復詩
句安排過輒忘豈謂鉤金同注瓦由來臧穀等亡羊異書
借卻思還讀老眼難邀炳燭光

漢銅雁足鐙歌為邗江馬秋亭半槎兩兄賦

槃下有篆

字銘云竟寧元年護為內者造銅雁足鐙重四斤
十二兩護武嗇夫霸掾廣漢主右丞賞守令麋護
工衣史不禁首山宮
內者弟廿五受內者

古器盤薄存形模虎彝擬周雖敦虞何來雁足遺制異土
花綠蝕延雙跗竟寧年歷二千載銘刻字畫雜繆及首山
之銅良可采昆田珍物來神區當時用致躬齋祓幽宮熒
熒照羈腰今也摩挲列几席一鐙還與無盡俱似我昏聩
等魚目獨憐背檠明雪顱憑虛結寫覓句難誰描秋菌工
春蒲遙羨紛紛鬪雅什考古作繪旋成圖

原作

馬曰琯

漢帝竟寧之元年虜韓單于稽首前鄉禮慕義願保塞

從此天子毋防邊帝因賜爵傳三輔寢廟寢園還故土
首山銅鑄首山鐙猶照鼎書翳復吐齋宮權火光燭天
破鏡梟鳥隨飛煙象形鎔范定儒士蹠足陽烏薦吉蠲
憶昔效靈來五色西河世廟矯雙翼冰弦瑤瑟踵甘泉
元酒陶匏牲繭栗慶雲清影未移辰未央宮瓦潛酸辛
蛻脂幾見華槃膩蠟淚俄驚甲觀新電抹星移二千載
硃碧沈埋出精彩祠官姓字細如絲鳥跡蠶文畱篆楷
老我眵昏眎若無摩挲古物媿空疎秋窻試聽賓鴻過
一點釭花認嗇夫

馬曰璐

炎漢鐙檠二十五想見神壇照風雨秀華細錯首山銅

未入歐陽一家譜集古字遺西漢前丹陽裴守搜荒煙
摹來雁足鐙銘古榮宮造自黃龍年何如吾家曩所得
自昔曾無弋人弋瓜皮綠活土花鮮蠶尾蠶頭月半蝕

銘文緣
槃之半

初疑槃仿蓮勺形

漢蓮勺鑪銘
亦彎環如月

既認趾同鳧蹠

青老眼觀書夜行燭年號依稀辨竟寧竟寧年間屢郊
時火續鐙傳接芳苾麟鬚難以拂霜蛾零落蛻膏與鳳
髓不將歌舞掛樓頭曲柄須煩黨伯舟皎然細炷輝齋
壁浙爾涼風裊素秋墮葉紛紛窻戶裏似有哀鴻拍秋
水炎光銷盡一咨嗟開闔殘螢竹閒起

和敬身同樊榭賦宋宮秋望用錢曲江韻

山行攜客鬪篇章薛路相於意思荒已歷紅羊千載劫猶

愛日堂吟藁卷十二
悲墮馬一時妝孤亭落照延秋色廢寺空花冷道場君本
錢唐江上住幾曾懷古認宮牆

愛日堂吟藁卷十二

愛日堂吟藁卷十三

仁和趙 昱谷林

小山續藁之四

題東坡先生雪浪石盆銘拓本用雪浪石詩韻

購得外氏山陰祁夷度先生文集又吳門王邵棠見
遺澹生堂藏書印章予蓄祁氏書僅數十冊年來欲
廣收而未能也誌感二首

寄賀葑林生子 題筠谷侍讀探梅圖

冬日喜代門自京師歸三首

乙丑元日大雪三日立春時老母病初愈賦此志喜
正月十七日招集樊榭堇浦敬身茨簷西顥南華堂

小飲時西顥卽別去閩中分得園字

代門擬於春盡啟行入都去冬梅花之約可踐爲賦

二首

賦贈魯秋塍山長

得婁江張大司寇訃音感賦

送表弟姚羽豐出宰米脂

哭汪氏第四女二首

中伏日雲閒人來遺生荔支初嫌其不佳再寄食之
佳甚偶閱笛漁小橐初食新州荔支色香味已變再
食色香味無損賦詩各二首又一律爲十八孃解嘲
余卽用其韻漫成三首 再成食荔支一首
舟過吳江望二高祠二首

晚泊嘉興二首

臨平山下霜葉二首

晚過安隱寺

冬蘭

十月十七日生第七孫與其父及長孫德元俱屬丑
庚取類命名同元作詩記之仍用冬蘭韻

雨後坐梅花樹下

花正開時風雪交作次日天霽花不少損再賦一絕
寄巢爲董浦作

德清徐象求親家偕諸郎省若陶尊枉過小山歸去
寄詩見贈省若陶尊同作季郎穀函亦有佳什均次
第依韻荅之

謝山約客爲衡岳之遊先各以詩堅之謝山詩中有

歸告諸婦之謔予亦和韻

樊榭示和約遊衡岳詩復訂先作臨平之遊再用前韻報之

謝山枉過春草園賦詩三首次韻

送春二首意林同作

樊榭以足疾不得遊臨平用前韻賦示三疊酬之

謝山出示鮎埼亭橐中有甲子冬寄予南海洛伽蓮

種之作恐值冰雪時未易希榮也賦和

倚樓牡丹從來無花客有豔稱某宅絕盛者賦此謝之

董浦自毘陵歸見餉陽羨茶予出新荔支噉飲賦正

謝董浦遺陽羨茶一器並見許鄭宅茶二首

秋雨蟬聲小住

遺詩

題東坡先生雪浪石盆銘拓本用雪浪石詩韻

中山設險風雲屯畫疆而守中華尊太守政理有餘暇剔
搜奇石娛朝昏濤翻雪浪落眼底渺然萬里江鄉村當時
羣賢疊倡和晁秦張李推蘇門空齋顏額來坐嘯聊以寓
意清詩魂盡水之變森奚似妙手難寫蒼雲根黑章白脈
發奇峭至今誰復尋癡痕銘揭環如黏壁月客至時與相
討論沿脣細讀竟無缺恍對玉井芙蓉盆等閒駁材足收
錄天吳瑰瑋形模存

公定州雪浪齋序云名其室曰雪浪

見天吳出浪頭自注
石中似有海獸形狀

購得外氏山陰祁夷度先生文集又吳門王邵棠
見遺澹生堂藏書印章予蓄祁氏書僅數十冊年
來欲廣收而未能也誌感二首

文獻江東舊業傳澹生堂認蠹餘編負慙宅相搜遺集重

憶館甥悲昔年家慈實祁之甥自幼撫育於祁先君嘗假

楹之樓望若忠孝成家惟習學兵戈換劫等雲烟黃金散

盡貧猶樂何惜初時裝釘錢昔人慨祁氏藏書散去有

繆書深印赫蹠光剗角精瑩水玉方四庫標題千帙徧一

瓶爭抵百縑強曠亭舊蹟荒園業曠亭額王百穀為夷度

已傾圮去扁棄之屋角亟攜以歸欲遺象清風曲水傷寓

於園中構亭仍懸是額以志景仰誰為流傳王粲是令人尤念蔡中郎書

為梨洲先生
所得故云

附作

全祖望

谷林五兄為梅里祁氏彌甥每見夷度先生諸藏
書尤寶愛不惜重價購之嘗索予方淙山讀易記
至再四予靳之未致也谷林下世子始悔之乃以
付東潛使供之殯前而告之

東白先生親迎時東書堂前賦結禱太君解誦青箱本
郎壻能歌黃絹辭爾時諸祁已衰落殘籤牘帙紛咨嗟
中丞止水血已化公子逐日魂無歸零散都緣佞佛叟
屏當乃飽屠沽兒梨洲先生曰祁氏藏書自季超學佛
一切視為土苴多半為雲門沙門持
錢去賣轉盼曠園竟榛莽憑弔淚灑如飛絲風流宅相真

健者代興蔚爲諸侯師小山插架十萬卷以視外家有
過之凱風寒泉孝子慕青氈故物先君思每逢澹生舊
手澤購之不啻珊瑚枝擬將一卷別著錄屬予爲序陳
慈幃白華之養在帶草一笑何必斑斕衣更有王郎擘
窠字東書堂前歷劫遺王百穀書曠亭二大字谷林以置園中旁搜未竟
騎鶴去令我愁過泊花池徐君所思在掛劍孺子不須
陳隻雞郎君試置兩楹上定有中宵降植藜

寄賀葯林生子

平頭垂六十老蚌果生珠

來札云今年五十七矣始生一子聞之定爲我賀

英物

蘭占夢清音鳳育雛詩篇誇斧手眉宇表犀顱今爲阿翁
舞分甘待挽鬚

題筠谷侍讀探梅圖

先生枕葑暇三傳且束締置身梅竹閒清氣入衣袂蕭然
塵外閒風月領光霽頭銜一條冰花事促歸計扶老策西
村西溪駕復稅得非杜五郎心跡轉幽翳放浪身世閒冰
霜調晚歲綠萼與橫枝佳名檢次第筠谷著春秋集義成故有三傳句綠萼橫枝皆梅別種凡二十許名見白石道人集

冬日喜代門自京師歸三首

慘慄歲云暮晤言情倍加酒人記燕市風物數唐花會面
醇重飲相看鬢各華向平吾願得不獨讓君誇

劇談昔年聚飲都下

不勝離合之感今歸來爲令子納婦因有向平之語

廿載梅花誤今胡不少畱西溪尋竹外春信得枝頭奉倩

平生感元龍湖海遊高情復何似不繫一孤舟

君不見故鄉梅花廿

年明春又將入都勸小住爲佳耳

蒹葭慙倚玉客裏轉相知竝馬披春雪同舟賦柳枝浪逢

河伯怒風迤石郵遲舊事重論起西窗翦燭時

此首皆記庚申春借

君南歸途中之事

乙丑元日大雪三日立春時老母病初愈賦此志

喜

纔入新年樂事餘還飄臘雪滿堦除桃符換過平安帖禾
麥占來大有書慈竹逢春身已健紫團修藥氣常舒壽親
養老無他術早進椒漿頌九如

正月十七日招集樊榭堇浦敬身茨簷西顥南華

堂小飲時西顥卽別去閩中分得園字

冰池晴照逗春痕破寂心朋與負暄小放疎花臨水際凍
畱殘雪在林園衰遲顧我吟情減意氣逢君別語溫爲記
流年一如此斜陽杯酒復何言

同作

王曾祥

連宵酒事不曾閑舊雨相看一解顏堦下寒泉侵石髮
樹頭小閣竝烟鬟門庭自足齊三徑物我應知付八還
爲語梅兄及礬弟好畱佳色待重攀

代門擬於春盡啓行入都去冬梅花之約可踐爲

賦二首

春北秋南似雁臣湖山舊夢轉相親多君一諾梅花約小

為淹留過晚春

春水方生君且住梅花欲賦字先香今朝速買西溪櫂廿載相思一夕償

賦贈魯秋塍山長

鸞掖文章聲價傳此邦宜著玉堂仙用坡公語壽親養老張曾

子師匠開經邊孝先風義今人存古道交情舊雨課新篇

殷勤推分通家禮遡到淵源各黯然先伯兄逝世先生風敦師門之誼不渝存

歿尚見古風

得婁江張大司寇訃音感賦

輿聽無冤頌堪嗟廷尉張從親悲地下錫類重

天章韋曲佳林靜西溪別墅荒平生感操彗東閣竟難忘

某與兒子一清蒙公顧盼昔謁京師辛酉春公來西溪又奉延接秋時枉過小山勤拳別去去年至雲間遊公橫雲山莊自別公來歷今五載故有東閣難忘之句

送表弟姚羽豐出宰米脂

儒雅今看緣飾初烹鮮官業重璠璣娛親捧檄臨關塞繞膝留孫侍板輿後日循良期報最盛年文采足清譽驪駒託賦君懷袖便面風開阿買書長清姪君壻也俚句命書扇遺之

哭汪氏第四女二首

女生子纔七日而身故遺孩襁褓命以小名曰

懷妃鑄於金鎖繫之臂上令其長大永念慈親

勿忘云爾

哭女衰頹日揮來淚已枯藁砧愁破鏡阿母失三珠三年連喪

三悼惜年年有襟懷事事殊重泉悲隻影得伴兩亡孀
呱呱纔七日母子永分離懷妃丁寧字慈悲形影隨長生
摩寶誌無碍懺蓮池報德同金鏡祇園灌像時

中伏日雲間人來遺生荔支初嫌其不佳再寄食
之佳甚偶閱笛漁小橐初食新州荔支色香味已
變再食色香味無損賦詩各二首又一律爲十八
孃解嘲余卽用其韻漫成三首

消受荷池晚雨颺鮮新喜得噉離支徐孃乍面驚催老盧
女逢春惜後時佳種楓亭閩地著南風綰羽舶帆遲色香
味共成三絕難繼禾中詠物詩

筠籃傾倒錯冰盤飽食論量百數寬稚子繞堦爭拾顆老

妻藏榼待需餐甕春終覺少生趣崖蜜還輸是腊乾昔年會出

荔支酒與嘯峯謝山意林同飲各賦詩坡公食蜜漬生荔支詩云逢鹽久已成枯腊得蜜還應是薄刑欲慰

清饑謀賈舶布帆無恙報輕安閩中荔支從海艘航至上海

滿座時新百果驅藐姑仙獨雪肌膚配江瑤柱似邢尹論
白楊梅分積珠粵嶠曾煩妃子騎南賓堪入侍郎圖娉婷
十八蓬瀛下兀是西施遠嫁吳

再成食荔支一首

蔡譜絳囊入陸書黃耳來珠璣百顆計舶趨一帆開妃子
當年笑王孫後日哀清時充作貢移檻遞輕栽今福建歲貢荔支種

於盆中帶實至京師及時可採

舟過吳江望三高祠二首

秋風祠下水如羅指點篷窻夕照多還誦老仙白石句冥
冥詩思屬烟波
幽棲笠澤真難匹秋興鱸鄉孰繼蹤更有鷗夷千載後并
將猜怨釋吳儂

晚泊嘉興二首

來尋蟹舍數尖團命酒呼兒佐晚餐消受鴛湖風味好又
延新月到篷寒
城外人聲近市喧橋燈遠似落星繁年年經此真無賴湖
水湖烟繫客魂

臨平山下霜葉二首

霞散楓林處處同臨平山下一衰翁卻教青女無才思染

到華顛不肯紅

樂事休嫌兒輩同

兒子式清侍行

喜拈詩句屬坡翁霜溪又誤朱

顏在不獨尊前借酒紅

晚過安隱寺

暮鐘聞遠浦明月正船頭葉葉風催暮蕭蕭寺贍秋名泉
當日記遺句後來搜撫景兼懷昔移情不自由

冬蘭

崇蘭冬放判天公獨秀珍攜九畹同香冷幽居親几榻月
高深院護簾櫳正宜辟芷江蘺詠不入春黃秋紫叢一種
孤芳誰與竝歲寒合伴所南翁

十月十七日生第七孫與其父及長孫德元俱屬

丑庚取類命名同元作詩記之仍用冬蘭韻

試號三日頌蘇公健犢嘉名又阿同湯餅新詩題繡襪猗

蘭佳兆發雕欄期他爛電英姿識伴我諼憂萬卷叢次第

五雛安膝上抄匙常自飯家翁德元生時予有今朝健犢小同生句

雨後坐梅花樹下丙寅

兀是疎花冷不禁江南春事半侵尋宵來夢逐臯亭路亦

共孤篷夜雨深兒輩看梅臯亭余不行

花正開時風雪交作次日天霽花不少損再賦一

絕

為惜飛花坐石臺雪消香賸暖相催斜陽一角風回處曾

否徐熙畫得來

寄巢為堇浦作

寄等鷓鴣兀自堪東青門巷遠城南遺經獨抱陳家具子

舍為歡輒臚甘新婦三言寧計早亢宗對客豈長酣舊巢

何日憑君掃清夢江湖記亦諳

德清徐象求親家偕諸郎省若陶尊枉過小山歸

去寄詩見贈省若陶尊同作季郎穀函亦有佳什

均次第依韻荅之

蓬室賓延榻秋窻主奉局檢方聆藥議接坐品茶經醇飲

心先醉深談眼倍青君家山水窟養德樂林垌

半月泉題句茗花水漾川鷗波葭玉倚孺子後先賢彥會

今難得前遊憶惘然昔年隨侍先君讀書清溪今已四十年矣林巒錫珠貝榛

莽發華鮮

朝來剝啄好音如一款柴關慰索居誼講苧葭原素舊詩
成冰雪總清疎卽看世業義生獻孰校才華邃竝舒蘊得
五經爲繒帛知君名下定無虛

荀家兄弟重吳西朗潤相資稱品題器埒璠璣推國士學
治稼穡待秋畦蘭成賦媿園名小謝朓詩傳首爲低後日
來歌白蘋曲輕舫先一櫂清溪

築園五畝半山澤於我閒身自有餘荷葉欲殘香故在菊
花纔放意先疎慚予匏瓠甘茅屋羨子壘篋集錦裾行待
秋風舒健翮人門繼美詔公車

鯉魚風過客衣涼共憩花前曲水傍一別小山叢桂下常
懷深柳讀書堂知音可許憐牙奏把袂重期泛羽觴柔艣
無端歌欵乃歸裝鰈子進沙棠

歲寒冰雪裏詩筒忽遞至開卷悉佳句雜誦喜忘睡吟情
想象閒佇興茅齋寄何由得面談於以析疑義尊公與尊
兄小別疾於駛盈盈阻茗溪好山緬蒼翠王家三少年角
逐研北事膝上坐文度此樂天所祕

謝山約客爲衡岳之遊先各以詩堅之謝山詩中
有歸告諸婦之謔予亦和韻

殘春冷雨如殘冬心朋小語談俳中二豪同是東隅客且
食蛤蜊嘲王融昨朝拊掌發高興衡陽竝翮秋南鴻勝情
不減許元度醒狂還有蓋次公湘潭杳渺烟水窟紫虛婉

夢日堂吟集卷十三
二
嬾瓊瑤宮七十二峯振衣上連珠一一誇詩筒石廩天柱
芙蓉列五峯崒崒九爭雄蘭芷遺芳續騷雅江山之助諧
楚風予獨年來何所似轅下局趣甘樊籠一從卻掃杜五
蹟無由得開同甫胸多君遊思挾情狀佳篇盈疊雕鏤工
歸時各向小蠻語譁然一笑嚼嚙翁

樊榭示和約遊衡岳詩復訂先作臨平之遊再用

前韻報之

吾生大似蟲蟄冬甕蛩不識天池中遊期汗漫已成癖嘯
呼萬慮能消融不愁三徑荒蔣詡不爲五噫歌梁鴻好事
若逢山澤友區區志不移三公揭來四明有狂客文章舊
價蓬萊宮迤邐相豈虞翻骨羞澀錢看坡老筒竟欲挾客
楚遊去壯心誰復知其雄南嶽三復杜韓句秋帆九轉瀟
湘風臥遊成夢覺茫昧此境幻劇同鶩籠寶鼎湖東勸小
住近探遠掇開心胸相於懷舊尋石鼓博物最數張華工
他時衡岳附遊紀不教寂寞溪山翁

謝山枉過春草園賦詩三首次韻

三載相思劇重論別緒幽賤貧猶似昔歲月竟如流餘閨
延春事荒園紀舊遊更逢多病裏雅諢破清愁

小築成閒事長吟有故人談經三過契取友廿年真竹洗
龍孫出山皴鬼面嶠憑君詩筆健草木賁鮮新

小樓寄栝酌詩思漫追尋主客披圖在池塘結夢深春歸
憑鳥語老去惜蓬心花月中宵共今朝入夏吟

送春二首意林同作

閏月望日

春歸黯黯坐池西老懶心驚首爲低怪卻子規尤好事五
更先我盡情唬

今年餘閏剛三月蜂蝶多情半月忙不使林花休即日總
憐蟬女怨齊王

樊榭以足疾不得遊臨平用前韻賦示三疊酬之
東郭履跡穿元冬趨健不憚冰霜中先生企腳談遊事俳
諧往復詩情融迢遙始計遵渚陸厥足用傷憐飛鴻著書
聊附車氏子閉關漫呼東園公跼躑兀兀百舍蜚跚時
時一畝宮臨平山路渺空際烟艇擘水開魚筒今朝竟作
杜門客輸他竝立崢嶸兩雄還誇連蹇跛能履賸欲距躍超

如風虻憐偶爾繫跬步葵知終不甘囚籠人生辦取幾兩
屐五岳突兀嬰子胸桐扣黃鶴培塿耳佳境想象詞難工
阻君清福不易受墜車醒訊天全翁

謝山出示鮎埼亭橐中有甲子冬寄予南海洛伽
蓮種之作恐值冰雪時未易希榮也賦和

冰池曉合鑿鬚開臘月疎山藕種來異地迢遙江海至違
時鹵莽雪霜栽碧筒語客難憑卷絲孔逢僧未易胎胎逃也出
揚子盼到芬陀華鬢日潮音南溯祝神媒

倚樓牡丹從來無花客有豔稱某宅絕盛者賦此
謝之

珍珠誰肯付樓東想見繁華內苑中贏得滿城公子醉爭

看翠色洗生紅

堇浦自毘陵歸見餉陽羨茶予出新荔支噉飲賦

正

消暑荷亭客亦嘉坐攜南果敵名茶乘流海嶠晶丸擘滄
水荆溪雪乳誇見許花香分鄭宅先親風味數陳家同時
二妙閒評卻邗尹相當一笑譁

謝堇浦遺陽羨茶一器竝見許鄭宅茶二首

茶珍陽羨百車渠搜到枯腸三椀餘不獨買田坡老計一
嘗風味便思居

炎歊匝月計相睽韻事多君見餉攜活火試煎三沸後建
溪還鬪虎頭溪

秋雨蟬聲小住

雨霑白露節蟬響逐秋征高柳延疎影涼颼憩晚晴感頻
齊女怨詩檢玉溪清際此閒庭院蕭寥愜我情

遺詩

一陽成復無全句建月逢寅已慟魂乃父年庚同健犢阿
翁頭白照清盆德滋初地苗方秀元養根芟竹有孫手把
遺詩和淚寫教兒休作等閒論

甲子春不孝於松江寓齋購得錫山遺響有元
進士焦鼎詩黃山人松石過訪攜贈元鑄德元
父銅印章蓋與長子名同而焦亦字德元適有
合者卽用焦寄趙中丞子敬詩韻賦七律一首

謝之山人歸而言之先君子并出示枉荅佳什
有真同趙氏連城璧恰是田家老瓦盆之句辭
旨竝妙允其酬和久而未就迨今見背收拾故
紙有一陽成復四字又有額腹二聯殆是未竟
之業也不孝涕泣足成附之卷末不欲使手澤
遽湮且命德元慎藏庶幾無忘祖訓稍能樹立
爾男一清謹述

愛日堂吟藁卷十三

愛日堂附藁卷十四

詩餘

長亭怨慢

花犯

仁和趙

昱谷林

簇水

琵琶仙

惜紅衣

探春

折紅梅

水龍吟

菩薩蠻

人月圓

摸魚兒

國香慢

菩薩蠻

鳳凰臺上憶吹簫

應天長

浪淘沙

水龍吟

念奴嬌

玉樓春

水龍吟

疎簾淡月

水龍吟

木蘭花慢

長亭怨慢

深春用姜白石韻

見水柳風搖空絮一摺池塘畫簾幽戶九十流光燕愁鶯
老頓如許倚樓孤思正遠道濃陰樹極目易關心最怕是
年年過此 遲莫爲春歸雨淚淚并落紅無數淒涼賦就
託心素故人持付更小聚晝掩柴門任歌嘯都忘賓主到
晚雨初昏人語冥冥烟縷

花犯

三月正當二十日與繡谷意林同譜

悵無憑春情晚晚流連只俄頃欲延芳景總判斷無多吟
度更永曉鐘未報銅盤秉風花暫管領卻準擬擁衾難寐
羅襦還自整 眠愁柳老夢如雲聲聲喚翠羽春歸淒哽
當小盡寒輕勒綠垂生杏開尊俎斷香臙馥聊與共廉纖
吹雨冷看一餉便成新夏重門閒晝影

簇水

冷泉亭看水

流水空山斜陽古道行人少石寒如瀉看雲景烟昏林杪
誰放桃花數萬點點紅波淼思舊事最深懷抱 孤亭曉

夢日堂附錄卷十四
俯淨穀平堦窈窕松徑外經魚悄清冷滿耳竟滌盡塵緣
擾雨氣溼飛衫袖壁冷燈青小新橫漲曲曲前溪遶

同譜

吳焯

平架孤亭細湍聽似幽修語昨宵雷鬪陡掉下銀潢翻
注捲起寒瓊千簇亂舞霜翎鷺一點點濺溼花礎我
來暮望隔水翠屏不見魑影裏眠烟樹囊風閣雨被石
埂橫撐拄待到寺樓鐘動冷夢斜河鼓神飛也江上秋
濤怒

琵琶仙

繡谷至廣陵與被江樊榭授衣讌集康山草堂
同譜是闕余遙相和也

人下揚州卸帆日羨近鶯花三月寒倚金碧樓高珠簾捲
初歇懽燕處流卮蘊藉更屏曲墨翻光凸十里春風三更
夜市歌徹烟墜憶騷客斜掩琵琶跨雕駿桃花映華髮
憐卻委身塵溷託孤吟清越休共指空山落魄竟放頽草
莽沈沒變徵傳得新音別彈蕭瑟

原唱

吳焯

樓午槐陰乍催起一弄龍香新撥初聽行馬嘶風秋聲
動蕉楫旋細轉春江暮雨又淒緊玉關飛雪二尺柔絲
一襟古怨無數波折儻遮斷花曲屏山只疑是重蓮
女郎怯曾記綠么終後換楓香奇絕贏得箇龍頭瀉酒
儘好教鳳尾畱月說甚紅豆相思故人輕別

惜紅衣

湖上水藻春暮初生嫩芽點點成燕支色清沈
水底鮮華可愛繡谷命畫手圖之索題

遠縠織蕞寒波瘦潔一湖春水白舫青簾沿緣俯深翠長
腰半面憐秀茁勻描新蕊紅細衣上畫文綴燕支金縷
荒橋野渚唼月吞香魚倉淺交戲珊瑚鉤影晚罨碧潭裏
摒擋玉盤冰箸擷取數莖纖毳佐小廚清供差與雉尊同
味

探春

雪月樊榭意林同譜

冰砌餘花碧雲破影寒襟入夜淒永野望痕消遙看清匝

贏得爛銀光併漫歷荒閒裏試危倚高樓人靜絮輕裝點
池臺鏡懸虛斂幽景吟悄夢回梧井嫌鳳蠟輝微風前
空秉屋角重明簾旌爭白文史冬餘交警雁斷平沙外誤
曉色蘆花千頃此後春消涼蟾誰共孤冷

折紅梅

樊榭索紅梅折枝

見冰容生暈霞分竹色一枝清絕拈疎蕊冷嫣零亂江亭
絳飄殘雪水西雲北任世外自成高潔肯因憔悴破費胭
脂更嗔處先頰醉時拋擷和烟露折好攜伴明妝膽瓶
雙挈欲賦八姨素面還譜比紅兒闕相尋健步眉嫵甚春
情初洩倦酡吟對玉笛朱樓偏晚風吹弄夕陽明滅

水龍吟

甲辰春暮倚樓見海棠葉底殘花用黃雪舟韻

玉几樊榭同譜

飄零又過清明畫簾淺揭湘紋翠雲妝卸卻纖膏餘在還
句蜨睡國色畱情紅心訴恨綠陰滿地數芳叢寂歷一痕
殘綴歎春事今休矣無那重攜鳳蠟賦清筵臨風掩袂
垂垂小住婷婷獨殿無多別淚依約丰姿玉肌香減醉顏
紅退悄憑闌不語羌無與伴隔盈盈水

菩薩蠻

題呵手梅妝圖

雙鷗畫就春愁集疎花曉折風前立雪色昵人看知他翠

袖寒卸妝還攬鏡斜躡釵梁影花氣上衣濃相偎只小
紅

人月圓

甲寅燈夜

錢唐原是繁華地舊事紀都城試看明月春街旖旎燈色
三更煖風欲醉清謳度豔樓閣蓬瀛衣香人影微聞笑

語京洛同聲

聞京師詔許
放燈江蘇尤盛

摸魚兒

塵梅追和元人顏吟竹與樊榭同譜

似迷蒙入廉纖雨枝橫髣几春隱疎花設色天真薄畫法
華光全領烟夕冷怕辟見靈犀坐失昏黃境圈紗畫粉任

蘇暈封開冰鬚滌次勻輒意無盡 偏憐卻吹著東風易
醒羅浮輕夢難永幻餘散等空花過彈指劫成俄頃還記
省正黯淡孤山路下行人冥此情幽甚悵寢榻沈銷天涯
溷落橫笛自淒緊

同譜

厲鶚

怪朝來凝芳盈席一枝幻出清瘦紛紜不用將犀辟付
與散花摻手無乍有想漠漠輕寒昨夜穿窻透紗籠護
否恐疎朵橫陳探春多誤更與灑冰溜 偷描處漫比
脂妝玉鏤寓形休污吟袖鹿胎幾點閒蹤跡驚覺軟紅
回首延望久恍翳月吹烟正是開時候高情似舊笑學
字蕭郎低徊未拂香影寫難就

國香慢

甜香

旖旎氤氳似鶯梨蜜劑養鼻滋生蘭閨味甘清輒不數椒
辛記取秋窻雀尾併拈得心字燒親波羅覓奩譜篤耨都
梁初未簽名 內家藏祕久認莖畱御款歲月侵尋忍教
零落空費臙馥殘芬合置思香媚寢鎖金粉幽夢爭春同
參茗甌過舌底回時斜倚篝熏

日下舊聞宣廟時甜香莖
罐上有制造年月王秋澗

詩粉香金
翠夢能甜

原唱

厲鶚

雨浥芳塵愛花瓷寶屑百種芬氳誰將蜜脾滋味散作
濃春顛裊微烟猶未寫蘭韻如幻如真輕翻小銀葉舌

本先參鼻觀徐聞 漢宮遺事遠歎尋芳難和按譜偷
分茗甌初啜依約攙了餘熏飄渺華胥一枕蝶飛來猶
戀梨雲回思殢人處寄與當時浣罷羅巾

菩薩蠻

除夜

春燈夜淺寒梅小千聲爆竹三更了春入酒先知酒闌春
力微 閒身慵筆墨心事消殘歇來日果新愁更番隨歷
頭

鳳皇臺上憶吹簫

車中記所見

潤臉籠花圓姿隱月後輪油壁輕車悵蔽寒春淺移檻芙

蕖纖膝纔容易輓箱茵底玉骨慵舒嬌無那難勝寶馬嬾
昇人興 徐徐一回小住來入市金錢空只憐渠又去轎

流水雷殷聲如陌上聽歌緩緩愁錯莫欲縐僊裾燒燈候

黃星細孃更步香餘

京師後輪小車
駕行輕穩

應天長

都下元夕偶出

銅街綺月珠市暗塵喧闐踏燈春夕是處南油西漆魚龍
戲蟾白良宵永懽醉惜想盡戴孟蟬妝額肯閒坐負鼓兒
郎太平搗拍 流水載嬋娟欲去還來香煖麝蘭逆鬧裏
粉搓酥滴琉璃豔青碧笙歌起連巷陌倚翠影五侯新宅
玉虬動鑰籞沉沉指鳳城隔

浪淘沙

伶人許雲亭音色絕麗時賢卽以雲亭兩字賦詩相贈余亦戲效譜長短句二闕

鶯嫩閣輕雲齒亦流芬櫻桃樂府總輸君金縷鞦提周后

小心事繽紛 花豔賽羅裙三沐三熏飛瓊仙氏幾回聞

無事認同呼小玉名記雙文

擅場一劇名小妹子曲殊側豔故用小周后事

又

小立自亭亭粉鏡吳伶眉如翠葉眼如星左右風懷春欲
訴柳困花醒 歌拍按雲屏愁到慵聽韓娥遺響鬢齊青
身學楚宮腰細細心有犀靈

水龍吟

庚申春中將歸西湖讀陳龍川詞卷葉水心謂
同父每一章成輒自歎曰平生經濟之懷略已
陳矣世多謂詞直小道耳似此亦可一吐襟情
閒發豪邁之氣惡可忽諸今檢其水龍吟一闕
原韻和之以寓古今同情竝感之意爾

正逢春半歸休年來厭逐塵紅輦修門悵別垂楊絲細流
鶯聲淺雙轂先脂一杯重酌東風妍暖歎萍蓬夢雨今番
去也憐社後新來燕 他日西湖望遠倚虹橋齒斜裝雁
朱顏易換青山似昔歌闌人散燕市前蹤北來南去烏愁
花怨向天涯訴與琴攜鬢尾恐知音斷

念奴嬌

膚

都下婦人繇鞵

畫帚釵底惜虜圓房子官繇雲覆小怯凌波塵襪輒稱意
雙鴛微逗步出霜花蹴來雪印不使輕寒透碧蓮柎似幾
層裝厭金繡 笑把弓月兜羅試將新樣無賴翻嫌瘦半
露鴟頭齊著淺暖放杯擎深又綺屨裁量翠幫熨貼鑪火
溫磨就伎鞵嬌褪化逢都在春候

京師月令妓
鞵化為鞵

玉樓春

春雪客感

騷騷屑屑春初夜燼落熏餘憐客舍儘教纖抱柳腰輕容
易疎黏梅額化 薄鋪鴛瓦勻分罅五出飄疑花瓣謝天
公偏勒一分寒慳與東風桃李嫁

水龍吟

庚申京師人日立春

韶年七日春回玉京次第笙歌起梅慳酒溢柳醒鶯螿都
關人意勝翦雙翹菜挑重瀾繁華帝里倩東皇做弄靈辰
合并探芳信今朝是 纔檢宜春帖子又催詩草堂題擬
登高往事旛簪雪鬢東坡老矣烏識春來雁歸人後流光
似水徧闌干幾度寒襟斜峭向天涯倚

疎簾淡月

畱別東壁介眉堇浦

燕臺舊雨賦一半春光別多孤吹似我歸休欲訴者番顛
額侵尋歲月紛如駛酒邊詞鬢邊心事雪痕消卻柳絲折

料

取語愁今始 倦遊去風儔月侶祇北山長往白雲深
闕煖鉢空彈千古有人同喟尊前共惜成懽醉駐征鞍他時
須記正逢社近年年舊燕畫梁新至

水龍吟

西湖競渡

節傳重午龍舟水嬉四集平湖徧驚翻雪浪驪珠標奪鱗
金蟠漩隔岸霓旌中流鼉鼓飛鳧翔轉看凌波淼淼料量
風物繁華舊錢唐擅 戲盡之而曼衍濯烟波雨絲紛濺
相憐畫艫臂寒縷彩鬟輕艾茜燕翦晴沙櫂歌香渚數峯
青盼任斜陽更立垂垂柳影水鞦韆殿

同譜

信

重攜蒲酒西湖來看競渡蘇隄徧水車似馬鬆船如駛
波心回旋鼓振深潭旗翻高柳繞亭流轉儼吾家畫手
染紅鉤碧點綴處名偏擅 最愛盤遊曠衍共爭標浪
花飛濺鞦韆更好船移舞影翬拖淡茜軟葛風輕香羅
雪襯捲簾曾見獨沿緣緩棹晚峯烟冥聽笙歌殿

木蘭花慢

題對漚沽上醉裏謠詞卷

頓閒愁底處指沽水正愁人記腸斷花閒南湖舊雨

樊榭鴛

水蕭辰

柘坡

清真玉田白石似諸公南渡問芳津消得寒鑪

幾許黃昏賸有吟身 逡巡冷澹酸辛鄉夢杳故園春等
湖上烟波竹西歌吹蹤跡前塵丰神箇儂誰訴送汪倫會

譜竹枝新

西瀨

同調龍文驥子天涯還又相親

花影香雨兄弟

愛日堂附彙卷十四

愛日堂附彙卷十五

昱移下

春草園小景分記

仁和趙昱 谷林

予兄弟有先人敝廬在褚家塘東北即古瓊花街也
相與棲息供侍老母子婦孫曾聚處一門以守素業
屋之西偏有小園略五畝餘先君昔年創構養疴於
中後予兄弟少加修葺名曰春草園取寸草擷春暉
之義兼寓羣季池塘之思園中池館臺榭竹屏藥闌
因地位置即物寄意分記如左披覽一過蹟雖近市
而朝烟夕月朋屐琴尊彷彿塵外之趣散帶負手意
行獨來蕭閒曠蕩不煩遐索而色養友于之樂又藉

天之所俾不吾菲薄緣日涉以記之

二林吟屋

卽南樓也亦曰畫選樓予與意林讀書處昔沈欒城符
葑林袁南垞嘗假館焉雍正癸卯甲辰閒共賦南宋雜
事詩觴咏流連盍簪於此羣書藏弄樓上額爲初白先
生書又題壁語春草池塘輒得佳句棣華碑版洵是奇
才亡友吳繡谷贈

小山堂

敬摹先賢晦翁真蹟庭有古桂數本扶疏偃蓋百餘年
物也淳安方朴山先生作記

倚樓

葑林初取名瓶笙閣今易以長笛倚樓句屬族兄中丞
晴軒先生書

染春源

大癡山池一曲寒源澄委風行縠演春水方生碧色如
染文魚可數佳趣絕殊每誦水真淥淨不可唾魚若空
行無所依之句欣然有獲

西池

池可三畝餘又鑿其陰令屈曲圍繞環植楊柳芙蓉蘆
葦春風駘蕩秋雨扶疏月落水平荷香四起鮎埼亭長
以補陀雪藕來栽品逾凡種雜以金蓮藻荇水底如鋪
錦罽焉赤鯉徑尺晚波撥刺響震幽谷昔人云五畝之

宅山澤居半擬效白傅池上篇一寫其閒適之樂未易得也

選句廊

仿古人選句圖檢唐宋以來絕句書之廊壁暇日巡檐雜誦一過

三十六鷗亭

宋姜白石有平甫放三十六鷗於吳江不及與盟詩云橋下松陵淥浪橫來遲不與白鷗盟知君久對青山立飛盡梨花好句成予酷愛之卽以名亭樊榭填喜遷鶯詞賦贈詞云風蒲低暑見白羽帶波翻翻還住闌影搖人簟文生夢夢入藕花深處閒笑汎湖伯越閒笑曉湘

懷楚晚涼外動忘機一曲悠然琴趣休去尋釣艇重理舊盟草合垂虹路倚扇開襟調冰膾玉不問是誰賓主三十六梯明月三十六陂秋雨戲招手認青天片雪飛來詩句程松門爲寫圖卷一時名流徧詠家學齋副憲行書勒石置之壁閒徐魯南先生題額

南華堂

庭前古梅數十本後植桂樹水周堂下一邱一壑位置天成里老龔璜玉所疊其尊甫筠谷翁雅善畫兼能堆大癡家法染春源數石猶其手筆與張南垣同時齊名璜玉能世其業亦工畫山成時年八十有四今惜罕有嗣音者額爲王筠林先生篆書

風木盦

先君子夙好園林不肖構堂供奉遺貌石門袁南垞搨
贈王百穀八分書風木盦三字旋得文衡山風木圖題
詩一律爲其先人溫州守而賦中有句云門戶漸乖非
復舊兒身多病只如前哀情感觸灑淚次韻與意林同
作一詩書于幀上

松石間

山有栝子松二株青蒼幽翳謾謾風濤恍奏隔水笙簧
額爲趙凡夫小篆

水邊林下

置小亭於山顛梅花開放下浮如雪清池環碧園中絕

勝處也

宛轉橋

橋成折水淥水斜通宛轉橋庶幾似之

篔簹徑

元遺山竹詩亦有文湖州畫意不畫形一爲坡所賞四
海知有篔簹亭

小一洞天

石洞幽邃彷彿飛來龍泓

山樊小屋

洞後小屋一間翠峯環列老檜陰森盛夏可以逃暑
隱几山樓

築臺起樓高竟三丈遠矚湖山俯睇烟市額爲陳老蓮書

天目樓

卽於山樓更上一層傑閣憑虛倚欄四眺南則吳山叢樹可數隔江諸峯列如畫幃其西兩山聳秀寶石浮圖直几案閒物耳值天高朗霽或雨過遙青迤北層巒疊巘飄渺天際迺東西天目也目欲以窮而境藏無盡北望有臯亭稍爲劣矣東則江海環滙曠遠杳冥海門一角孤撐霞外時隱時見額爲錫山南沙秦先生分書

三角亭

宋人俞退翁有題三角亭詩云春無四面花夜欠一檐

脍

雨向屬石門袁南垞書此一聯乾隆庚申夏山陰金丈小郊假館園中換書缺隅亭額取韓詩外傳衣成則必缺衽宮成則必缺隅之意雅與三角亭名吻合云

白雲半閒

張伯雨外史詩集題有云白雲半閒

教學精廬

王去非云學者學乎孝教者教乎孝故皆從孝字慈湖蒙齋謂古孝字只是學字愚按古文韻學字古老子作孝教字郭照卿字指作孝見王伯厚困學紀聞予兄弟幼而失學先君早逝無以樹立奉侍老母難冀三釜之養頭顱如許浮沈鄉曲識此字義憮然于懷爲築一室

課諸子姪小孫輩俾無負教學之義爲厚望焉

曠亭

曠亭乃山陰祁氏曠園舊額王百穀爲夷度使君書使君諱承燦爲中丞忠敏公父忠敏公吾母外祖也吾母嘗爲某言昔時梅里園林人物之盛澹生堂藏書十萬卷悉人間罕覩祕冊又東書堂爲五六兩舅父詩壇酒社名流往復之所閒率羣從子姓及祁氏商氏朱氏懿親閨秀吟詠其中當時藉甚至今稱之嗟乎華裾簪黻衰盛靡常由後思前渺同隔世某耳習之稔矣憶初過曠園時斯亭巍然修整再過蔓草侵堦日就傾圯三過并亭亦無之扁棄牆下幸不爲風雨所剝壞急向園叟

售之而歸謀于竹閒構亭懸額焉吾母見之復悽然曰吾自幼失怙孀母熒熒爾舅不事生產家益貧困賴外家撫吾備至爾父館甥澹生堂及見牙籤縹帙連屋百城六舅父坐事遣戍瀋陽旋出家爲僧終于戍所五舅父暮齒頽齡嗜書彌篤焚香講讀守而不失惜晚歲以佞佛視同土苴多爲沙門賺去五之配曰張楚纒六卽吾姑名趙璧者也皆能詩吾少育于六舅母而卒來爲汝家婦適符趙璧之稱寧非數耶今去故鄉幾六十載渭陽音問久隔遺書散軼過眼雲烟而園林更不可問矣重見是扁如見舅氏爾幸攜得爲之構亭景仰前修正愜吾意竝命小子識之謝山爲作記

樂無事齋

古鏡銘樂無事日有喜宜酒食

泊花

臨池小憩荷花環繞額爲李長蘅書

谷林堂

吾家先世本上虞人谷林上虞小阜也見太平寰宇記
予以爲五十字識所從來也額爲萬九沙先生真書

耕養草堂

荀子子道篇云耕耘樹藝手足胼胝以養其親又揚子
云古之學者耕且養予兄弟託蹟無俚舊學荒落四體
復成嵇嬾思躬耕壟畝而力不逮謀菽水之權僅遺先

人薄田二頃以佐甘臙耕旣不如老農養寧得盡子道
耶顏諸草堂以箴座右

先君子雅意林泉暮年色養無違杜門卻掃屋
舍西偏有小築曰春草園邱壑具焉庭前列植
古梅桂樹數十本雜以栝柏梧桐安榴椶筍復
數十株竹竿千个繞池疎柳依依池沼蘆葉荷
花荇藻交橫文魚游泳小草如白海棠翠陰草
黃薔薇白丁香之屬竝皆佳品落伽雪藕之栽
素心蜜梅之乞時時見於篇詠烟扉雨砌薤草
扶花與園丁共挽漑或坐月迴廊九夏溽蒸三
冬寒慄不自禁也性樂友朋二三選言稽古之

家山生明要卷一五
士往還雜說故事徵字類聊與嬉娛倘田峻相
過亦劇談稼穡每好煮茶論文有餉遺五渚七
閩汎湖越嶠裹箬而至者貯以篋笥承以石粉
雖久色香不改客來滌器勺泉領略清味以故
謝人惠茶之什最夥飲少輒醉遇轟飲大戶出
醇醪賭勝負藏鉤射覆袖手旁觀燈昏瓶臥之
餘更不屑以公榮自處也嘗思屬好手繪圖題
句先成分記用爲緣起彙次成編附諸卷尾年
來家業未充不遑營構其山樊小屋曠亭水邊
林下僅規基址作不了因緣嗚呼人壽幾何河
清難埃今忽焉厭世不孝兄弟形影孤露昔李

文饒戒後代無以平泉一樹一石與人且云鬻
平泉者非吾子孫也彼名位赫奕如是尚慮後
人之毀棄越在底下之地頑陋之資能無堂構
是懼乎若夫薈萃羣言別名曰春草園集請徵
諸異日今茲未逮矣男一清式清謹述

愛日堂附彙卷十五



